

浮梁縣志卷之八下

人物 列傳三

儒林  
耆德

文苑  
方伎

孝友  
釋老

篤行  
流寓

義行



志邑人士業已運際秦交時逢蹇塞威能行義達道有光  
邑乘然禮重儒行士珍文藝彼望重山斗聲流金石阜山  
昌水精靈翕聚非襲而取也至秩天親於門內敦信義於  
鄉邦曰祭酒曰典型皆足維風教光汗簡也雖然皆遊  
乎方之內者也而彼且遊乎方之外也士各有志無從同  
焉若夫高人所經一榻千古雖鴻爪雪跡而論者猶推本  
於地有靈云

儒林

宋

朱宏字元禮長安都滄溪人少穎敏讀書即了大義為詩文以理為宗比長彙科舉業厲志聖賢之學聞國子司業計衡學有淵源偕弟綬往從之遊宏精思實體於性命道德之說靡不究其根柢慨然以斯道為己任方岳重臣文章薦舉辭弗就士大夫宗仰來自遠方與朱晦庵熹迭相往還講唐辨難以歸於一熹嘗稱之曰高識篤行鮮與倫比為銘其堂曰克己學者稱克己先生平生莊毅介特燕居未嘗不冠帶有事家廟非疾病必親必誠尤嚴異端之防熹守南康時取孝經庶人章解之有不須念佛號佛經無益於身枉費心力之語宏跋而刊之又作迴瀾集以斥佛氏

反覆辨論惟恐學者陷溺其中至陰陽巫覡之類一概屏斥行之既久鄉里亦皆化之又述古別婚喪葬之儀名曰禮編嘉定庚午疾革屬其子曰葬祭以禮毋惑異說言訖正襟危坐而逝壽八十後饒雙峰魯四書講義子游為武城宰章曰若朱克己者信道篤崇禮嚴乃浮梁之滅明也又為之贊有斯文宗主吾道老成之說所著四書圖考六經義惠綬集有信論并迴瀾集藏於家元季兵燹子孫懼其燬承以雙埋土中年久俱壞惟禮編行世祀鄉賢綬字元美亦有學行年九十卒

金去偽字敬直淳熙間一舉於鄉即棄而從朱熹遊潛心體驗學者稱曰草憲先生或勸之著書曰經經也諸儒之訓

釋晦庵折衷之集其大成矣卒不著書授鍾離主簿不就  
與諸儒講學於鄱江書院理學大振今其地號曰弦歌巷  
祀鄉賢

甯乃字文若紹熙慶元間再舉於鄉授縣尉不就以詩書訓  
子弟義方家延為師遠近負笈者多從之每教人以正心  
行己為先且好施予號德星先生

程達字彥通政和乙丑進士性嗜學老彌篤窮經史百家入  
官輒乞祠創鄉學樂於教人多所成就所著有易解語孟  
直解五經解題

汪天定字子奠湖田都人沈默朴誠動必以禮淳祐間一舉  
不第杜門著書元初羣士推為長鄉書院山長天定不欲

就妻勸之行擔笈者四方雲集所著詩經解義論語解義  
妻程氏鄰女孫也亦知書有桂堂詩草

趙介如字元道石嶺人從江丞相萬里遊端趨向澄念慮其  
學靜深有本登寶祐癸丑進士通判饒州提舉公田後元  
起為雙溪書院山長教有師法遠近從者甚眾

元

汪自度字醉翁克復從弟也傳聞敦行尤邃於性理之學元  
時屢徵不起築破石齋棲止賦詩明志

彭籍字季文里仁人泰定間試於州有聲益肆力於經術聞  
臨川吳草廬講學為學者所宗籍徒步往布水谷執弟子  
禮請業專志篤思草廬問籍曰子來欲為科舉之學耶欲



為性命之學耶若學為科舉則吾絕意於進取若為性命之學又大拂汝父兄望子之心必何為而可對曰明道則所以誠身餘非慕也曰若然則汝可以居吾門矣草廬每有議論籍質問所疑多所啟發學成歸江西行省舉之為江州景星書院山長辭不就入石嶺山莊講學元統間罷科舉更撤學校莊田給宿衛軍時皆以籍所行為高籍亦遍遊印証所學謂安危俯仰倉皇窮困可以驗己性情之正及門稱為西巖先生 見昌南歷記

郎玉字五瑞里仁人雍容謙退讀書刻厲初別舉茂才師事趙介如介如登鄉榜迺入臨安成進士玉俱從為負笈執爨求學之念不衰咸淳季年詔諸生納粟給告身入仕玉

父欲捐貲以例進玉曰既為儒者而不由科目進身內顧衾影何以自存恒居閉關深究義理介如重玉之勤曰難鳴風雨不輟其功聲色貨利不分其志惟郎五瑞耳 同上

吳迂字仲迂西隅人天資絕人力探理窟一舉於鄉不合不復屑意於詞章訓詁間饒雙峰魯講道石洞書院往從之遊魯喜其立志堅確用功精密盡以平生所得者語之自是體認益親踐履益實元兵下饒州退隱橫塘山中從居者十餘家皆周其匱乏亂離中猶講學不廢皇慶二十年知州郭郁延為州庠師躬執饋食之禮兼長鄉雙溪二書院生徒類聚之其教學有序訓有則課有程人材一新名公巨卿造廬者踵相接學者稱可堂先生尋退而講道於



邑北瑞蓮精舍受業者蓋衆若進士鄭合生章穀鄉進士徐遜汪克寬其卓然者也年逾八十視聽不衰著述不倦九十三歲而終所著有易學啟蒙詩傳象紀書編大旨左傳義例左傳分紀春秋紀聞孝經附錄語孟類次孔子世家考異論語譜論孟集註附錄論孟象紀諸書其門人桂漢查鑑如鏤板行於世明永樂間詔輯經書性理大全多引用其說祀鄉賢

徐杰字杰之幼以穎異稱長益學問薦授蒙山書院山長學士盧摯稱之曰南州高士舉元江西儒學提舉中書左丞善循薦其才授詹事院賓客說書以議論不合引去

明

徐遜字士謙從吳廷遊潛心經史以博學稱元末于光據州延為師勸其除害惜民頗於民有濟光歸明遜遂杜門不出洪武間以江西僉事召上書丞相禮辭不起

朱彥俊北隅人洪武初累舉明經力辭講學談道士多樂就其後有方游鄭光李璉亦皆以經術徵不起游字公藝章昭字文明好學能文兩與纂修實錄有司屢以經術徵不就著有蘭雪集

、蘇廷惠字介臣方學篤行當元末流離困苦不改其度洪武間應詔至金陵獻書陳八事將萬言有二事稱旨餘為御筆所抹勅以散職回籍時謂廷惠書多經國大猷以不見用惜之既歸杜門著述以終

李曉字未夫田西關人天資高敏蚤歲放浪不羈年近四十赴省試聞有講學會往聽不覺汗下沾背歸遂折節自勵繩趨尺步躬灌園治生手一編危坐吟咏對妻室如對賓友與鄆陽史惺堂桂芳遊史嚴毅刻苦踏實為學晚謹飭中有超越自得之趣一日友人私舉鄒東廓羅念庵為問益亦以質惺堂之學也曉曰更覺東廓先生平鋪耳衆皆服其冥契郡守陳吾德延為諸生講當張居正禁學之日嫉者論陳連曉不為動其學自翻然悔悟來不從聞見上隨人脚跟轉故一掃支離指點亦直截易入臨事則有沉思定力邑人始而疑已而翕然宗之卒祀鄉賢

潘葵字日臣幼孤立志向學以講明義理為主補邑庠事嫡

母孝母歿廬墓三年刻苦力行終始不渝正德初學使蔡清行郡表之曰尚賢廬困場屋李夢陽欲薦於朝尋卒誅曰晚生千載僻處一隅青年白髮苦只為書梧桐月淡楊柳風疎獨立斯境想慕何如可以見其為人矣著有皇極數傳洪範本傳易思得錄大極圖深衣說等書今散失無存祀鄉賢

徐時豫字以順萬歷戊子舉人勵志行事親以孝聞而方正寧靜茹苦高尚絕跡公庭士風為之丕變未第卒通國惜之祀鄉賢

汪嘉字文亨桃墅人賦性懇至執親喪廬于墓側服闋依依不能去因取墓前擔潭自號以誌終身之慕平生潛心理



學不求聞達純修峻節表範一時鄰境有盜被擒語主人曰到官惟命幸毋令桃墅汪某知使人愧死嘉晚歲講道益勤遂闢立經堂又倡其族砌印墩著有水口印沙文萬歷二十三年舉鄉飲賓官師表其廬

馮國逸性謹朴究意理學通詩易大義居家友讓以已產均其兄弟嘗授徒于外有孀婦夜來奔闈戶拒之人稱其守著有和庵集

汪勝一名勝林字汝賓桃墅人郡廩生學務自得灑然超悟胸無一毫芥累講明義理接引後進懇切真誠邑中有志實學之士多出其門晚號省乾學者稱省乾先生

李廷萼與子大化皆邑諸生家貧修潔世敦孝友相繼講學

大化尤超詣初聞良知之說於鄒泗山德溥遂與李晚俱以理學為己任尋師事羅近溪汝芳聞一切放下語益洞然知所致力雖其教宗陳白沙王陽明以溯陸象山然真知實踐視訓詁辭章遠矣所著有四子義經解及講學錄諸書

詹士敏字學卿珊之子萬歷間恩貢婺源源績溪訓導陞修仁教諭講學談道多為先輩所稱白鹿洞講習錄婺源儒學五倫編皆采其語

汪自如字如是桃墅人郡廩生少即灑落絕塵從其族省乾勝及祁門汪碧潭揖遊以講明心性為學所善焦漪園竝稱曰非吾友輩也千秋絕學有託矣嘗中萬歷癸卯副車



遂謝試校課徒範俗全其初志著有中白自證錄黃太僕龍光謂其超邁類心齋王良透徹類龍溪王畿鄉人至今守其訓約

朱境字景化滄溪人博學經史為文醇古雅潔邑廩生四方從學者先後數百人多致通顯時明季風俗漸澆境持身嚴正言動不苟晚結屋僻鳩居焉

俞敬中字純甫下連都人萬歷戊子選貢博通淹貫詩文有大家風銓選別駕不就樂道著書誘進後學務為陶淑不屑屑於章句記誦士多樂從之順治間土寇亂避居於萬壽寺之茅仙池吟咏不輟年八十六卒著有碩池稿奕芝堂稿石圍稿因遭兵燹無存學古者不勝惋惜

程先民字匪先西隅人邑增廣生性端恪愷悌力學致行於世紛一無所競隆萬間王陽明守仁學大著先民講論獨尊程朱為文取法大家不以詭異雕繪為工及其門者多成名士年八十二卒著有學庸數言周易講義禮記刑釋定本等書藏於家今盡逸

戴國慶字元賞北隅人四歲失怙母教之幼穎敏髫年補邑諸生九試棘圓兩列副榜萬歷癸卯已掄元以策犯時忌摘之遂棄科舉業以考訂諸經註疏同異及性理子史訛舛為事大肆力於古文辭卓然成家從遊者多名士性溫厚和平事母至孝鄉黨服其義讓年八十有七卒著有五經秘要等書

黃廷幹字良弼西隅人天啟間歲貢潛心力學文章用意深  
刻教人自為士多宗之

姚葆素字履初西隅人淹貫經史百家以所學因材立教崇  
正癸未由歲貢考授知縣不就性甘淡泊嘗曰古云咬得  
菜根斷百事可做與其多取作無益之費孰若少用全寧  
靜之天識者多佩其言

汪自遠字邁之桃墅人郡廩生性恬退清修亮節介如也潛  
心理學始時師事族兄中白自如得其淵源及授徒以變  
化氣質崇尚經術為務嘗設教建德曹氏曹之里散俗頌  
革比貢成均自以無心進取遂推讓後人不就以終

汪演字天如桃墅人雄才異學崇正癸酉弱冠舉鄉試第四

名傑一時與棗鄉艾南英臨川羅萬藻章世純陳際泰友  
善以大成自期而公車屢躓嘗擬元得而復失律身靜約  
時人罕識其面年七十卒

國朝

張彥生字鯁臣侈溪都人順治丁酉舉於鄉博學多才以文  
名而詩賦尤傑出至於天文地理五行之說靡不該洽時  
皆推為通儒未及見用而卒

閔德輝字時儀西隅人順治庚子舉鄉試第二為人方正自  
持言笑不苟事母孝睦族有禮品望為時所欽學問優瞻  
尤精易理制藝之流播又其餘也

汪國猷字嘉賓桃墅人順治間歲貢少嘗從其族自如遊故



於心性之學洞究深微一切載籍記覽淵博為文旨趣高  
奇試輒甲其曹偶授徒甚眾藝業俱有法度平生律身嚴  
重疾言遽色不加於人而分金折券完人骨肉每多好行  
其德年僅四十有八卒遠近悼惜子四俱名庠其三元顛  
自有傳

李森字立伯上義都人順治間歲貢清高自適明理力行以  
為學及卒貧甚生徒賻之乃殮

朱來繡字君裳一桂之子邑庠生朗悟天得慷慨有大節力  
學以明理適用為務而於子史百家靡不窺究性純孝事  
母竭誠老而彌篤喪祭一遵文公家禮攘斥浮屠所撰關  
佛編詞嚴義卓直足扶植世教與修前志其先著有縣志

南

考謨摘謬二書當時多取裁焉

程之吉字季修西隅人康熙間歲貢任新喻訓導稟資醇正  
邃於學問經明行修令譽廣孚所著詩古文亦大有名於  
時一官早退以禮法文章為後學宗充鄉賓年八十有一  
曹國屏勸義都人博學能文不圖進取屏跡山齋鑽研典籍  
務晰義理之精從學者甚眾性謹樸雖燕處未嘗不衣冠  
孝友禮讓以身倡率其族卒年七十有四

李思申字君楚曰修之子康熙己酉舉人性端方純摯甘淡  
泊重聲氣惻惻歎歎以扶樹後進為急學問富瞻諳於典  
故郡守聘修府志先達多就而折其中

朱崔字素臣北隅人始授書即知探究義理為文日益有名



弱冠食餼晚乃得貢時邑令王臨元雅重崔數通殷勤崔高尚如初康熙十三年避寇山中寇約其黨曰朱某善士所居不可犯且來謁曰得毋饕餮缺乎某處穀若干敢以薦堅拒再三遂奔婺源之長溪得免其平生守正多此類汪子幹本名楨以字行執墜人父欲立字卓爾邑庠生醇修介節德器粹然子幹穎異力學由思而疑由疑而悟遂見道源為文以氣勝而法律森嚴卒歸理要自童子時試輒冠其曹偶及補諸生授徒百輩各有成立事兩親孺慕終身居憂並廬墓側三世單丁而視族昆弟如一體性剛方巖巖不可私干然推誠待人貧而好施雖橫暴莫不感嘆媿服慷慨赴義康熙寅卯間嘗以口舌屢折賊衝賊亦聞而避之家法最肅每教子孫曰一節不慎足墜生平年七十有七卒以子兆熊知全椒縣 贈如其宦海寧許大宗伯汝霖為之傳有云重規疊矩廣川儒者之家舍英咀華扶陽經術之第又云鄉鄰被過恐貽王烈之知寇盜聞風勿犯華秋之里皆信錄也

李實字祖蔭東陽人邑廩生事親以孝聞生有殊質長始讀書目數行下一過不忘然務講求義理推志儒先之學擅譽舉子業每試魁其等夷士經指授者皆顯名一時平生所著文藝甚富及地理醫術諸書亦有考訂傳於世

吳敵字克勝舊志作極字育玉明黎平守宗吉孫也邑廩生能世共家學嗜古工文博綜典籍嘗著昌南歷記考據精

核序事詳修辭潔深合載記之體兩次修志多所采擇邑  
前誓書多散軼藉是書為文獻之一助云

金起濤字飛客引京都人康熙甲寅歲貢漁獵百氏一折中  
於正學與修前志大著作多經裁定及門皆一時名雋著  
有學庸註疏性理考異

鮑一參字惟水文宏幼子領康熙甲子鄉薦少賦奇智讀書  
兼人以格物克己為學抵排二氏工古今文詞書法亦精  
妍可喜性至孝母早歿乳於庶母事之等所生恬退自守  
耻與靡俗相角遂然同志之士文酒歡呼宛然風流人豪  
也年未六十卒

汪鴻基字靜子桃墅人康熙丙戌歲貢力學攻苦淹貫百家

而最篤信朱子老而益勤且堅其所為詩歌古今文辭皆  
高潔絕俗出其門者文學皆得正宗立身嚴毅寡言笑內  
行肫摯勇於為義事父母及繼母盡歡居喪有禮終身哀  
慕推腴產與兄晚復贍其衣食先是梓舟都歲苦茶稅鴻  
基獨力請於當事遂得鐫石革除當是時奔走會城者三  
四載已貲罄弗計也家既貧自守逾峻杜門課子諄諄於  
義利公私之辨嘗言心不可一息使暇逸臨歿猶以誠其  
子年終六十有五

程元章字又斐里仁都人康熙戊子歲貢守身嚴正學行並  
為時所推以文課徒甚盛及門往往擢科名子廷莘字伊  
野亦能世其業臨貢卒



方震亨字修吉西隅人德性端凝強學敦行不苟笑語邑無  
先後輩皆敬憚其為人知交中時遇有事或水火相構每  
乞一言為重賴以了決康熙丙子鄉試主司定其卷為魁  
房官爭元不得恚而置之終於歲貢

吳璽字公遜新正都人邑廩生幼而祇恭人言無間比長豪  
於文章試輒首選然廉隅自飭確如也雍正初縣令吳邦  
基敦請課其子璽堅不就吳令嘆曰恪守卧碑公門不入  
殆斯人歟卒年六十有三

汪經字公常潭口人慧而勤學弱齡受知長吏亟加特拔既  
籲於庠為一黌雋經明行修表正人倫嘗舉元鄉飲賓初  
前令張景蒼闡義學即延為師累八九年成才百餘輩登  
賢書貢上雍者踵起至今多士頌慕不衰

王有位字汝思下連都人邑庠生性醇雅不尚華侈幼即穎  
異讀書過目不再作文操筆立成授徒講易一時推仰卒  
年七十七嗣子學懃字惟敏學問淵通尤工韵語食餼郡  
庠及門獲僮多人其始為伯父後甫十齡以孝聞竭力事  
繼母四十餘載無間與本生諸昆弟備極友愛時人稱其  
家風五十有六年

汪蔭生字汝集侈溪都人邑增生祖父皆有聲庠序因貧與  
兄就產尚西部都蔭生兢兢家學甘貧奮發博涉經史為  
文峭刻清真試甲其偶授徒多人因材造就嘗督學使取  
士一案半出其門下時爭推其師法云



汪達字非聞，桃墅人。為人方質立節操而靜默安敦，飭行純篤。其學涵肆多通，尤邃于六藝。有問必饜，含意愛竟日危坐。雖門弟子莫測其翰博之由。其文章高簡醇厚，弱冠補諸生試，必高等。雍正癸卯拔貢，甲辰至京師，受教諭職。歸後，推克鄉飲正賓。性孝友，早孤，居憂毀瘠，事祖母與母力貧竭，館穀承歡，餘以分贍昆弟。德器克完，造次不失常度。鄱陽王學士傳嘗訪之中，黨講，聖稱其光霽，中壁立千仞。識者以此語最善形容。所著有四書正義、周易衷微，惜皆燬于火。年五十六卒。

鄭珂字宗幹，長寧都人。幼遵庭訓，學有淵源，稍長持躬愈謹。常遊滄溪，閱鄉先儒朱宏著述，悉遵考亭，慨然有潛心理

學之志。遂手輯性理近思錄、讀書錄并十三經要義、朝夕體味。年念四，父命應試。文中有靜虛流為明通，取與凜諸道義之語。李文宗嘉其有得於性理之精明。年食餼，由是學問日深。行詣日篤，授徒古華。若從遊日衆，嘗言聖賢義理體之在身，心見之於文辭，勿作空言。觀方為實，得其躬行實踐，事父母以孝待兄弟以義。家雖貧，束修所入除養親外，盡散兄弟及族黨。姍姍之不給者，待人無畛域。一至誠相感，故與處者如坐春風。即鄉里忿爭，得一言無不帖服。晚膺恩貢。學者稱古若先生子冠庠生。

閔如松字筠友，北隅人。乾隆己卯舉人。為諸生試，輒高等。文出學者奉為矜式。其為文以發明經義為主，密體傳註以

晰其理博參經史以厚其氣本之先正大家以範其格律  
故其文精醇而正大主昌江書院最久從遊者皆沐成就  
邑令黃繩先黃泌不輕許可獨推閔先生孝友嫻睦人倫  
宗師舉鄉飲人比之子游滅明云

朱日堂字次俊儒林都人雍正丙午舉人生有至性事親孝  
與人信學問淹洽而手不釋卷教學務敦實行課文先經  
理法力去陳言家貧而操守益嚴布衣蔬食怡然自適邑  
令李淳德聘掌昌江書院舉鄉飲正賓晚年貧不自給邑  
令黃繩先高其品同儒學周鴻勳各捐廉俸併撰文勸紳  
士資助稍賴以濟八十有四卒

閔廷耀字漢章湘湖人性孝友為諸生時館於槎溪距家十  
餘里朔望必躬省視及親卒哀毀骨立喪葬如禮歲時祭  
祀輒鳴咽流涕兄弟六人同居數十年無異值歲歉米貴  
廷耀倡首釀金買米載歸減價平糶一鄉賴之邑令李仙  
洲延掌昌江書院教訓生徒黜浮崇實令以士林師範旌  
之乾隆十八年考授歲貢二十年邑令楊文灝舉元鄉飲  
大寶年八十有三卒

貢生曹維新字達楚勸義都曹村人天性孝友器識深沉為  
文逼古大家授徒講學以居敬窮理為務有纂集易經十  
翼足為後學津梁生平重義氣有肝胆如逐藝邑冒籍改  
省倉為鄉試公寓并清左右店屋十間面前望江樓一座  
等事皆毅然自任不避勞怨邦人士奉其主祀于公寓子



川舉人官寧州學正遇

覃恩贈如其官

庠生金大鳴字聲遠藤鳳都人秉性淵靜立品端方讀書務  
窺理奧日記功過以驗得失與及門論學必先躬行故從  
遊者多成大器又性方介非公不至公庭不知人間有炎  
涼事閑家嚴正居鄉和平年八十無隻字入官訓七子以  
詩書學光歲貢生尤知名

熊兆飛字煥章長山都人經籍宏博文辭精深乾隆辛酉拔  
貢丁卯五經中式舉人六上公車屢薦不第鄱陽縣令黃  
登穀聘修邑志深加器重授徒景鎮造就多人其學純養  
邃沐其教者如坐春風而圭璋雅度又望而生敬子硯田

庠生

程堂字輝字興田人幼穎異甫授書矢志不僅取科名既長  
有名藝苑從遊日衆學宗朱子文法五家乾隆壬申學憲  
湯旌以優行乙未學憲蔣考授歲貢平生言笑不苟取與  
必嚴而峻介中復和易近人士樂親之性儉約布衣蔬食  
老而不易士林咸為矜式子學義舉人試用教諭

施定字文止杭漢都人性穎異年十八補諸生試輒冠軍為  
學務立根柢多讀古書文以醇正為宗邑令陳惠敏張琨  
皆聘掌義學其教人先端器識規模嚴肅中仍春風和氣  
被其澤者自能收束放心士林稱靜庵先生十赴棘闈不  
過年七十授歲貢生生平處已待人一以真誠不立崖岸



尤篤族誼修宗譜年終七十有八子治光庠生另有傳

洪之梁字奕山東隅人篤志力行精性理之學為文簡古醇

粹法本先氏教誨多士率遵軌度乾隆元年 思貢生鄉

飲大賓年七十有二子學煌乾隆庚辰 思貢

李紹潢字演藩東隅人進士教文子幼英敏名噪庠序膺雅

正乙卯選拔中乾隆甲子北闈副榜凡有著作藝林傳頌

不幸歿於京帥未竟厥用士林惜之

汪作霖字元彩北隅人幼補諸生旋食饑肄業豫章書院文

名大振生平敦孝友尚謙和從無疾言遽色年四十九應

領歲貢貴志而歿子逢瀚監生鰲庠生孫瀾拔貢現在四

庫館議叙候選

貢生凌九政字惟醇西隅人品重藝林從遊者甚眾其教人

重躬行敦實踐多讀書籍為文取法大家多士遵為矜式

兼通醫理治病多奇中家雖寒性好義有貧病鬻妻者傾

囊全之併痊其病士論高之子渭颺庠生克紹書香

鮑師曷字炳如歲貢生前明進士文宏孫舉人一麥子性醇

粹學有淵源試諸生輒高等其教人也理探正宗文尚村

茂從遊者多成大器平居杜門課子足跡不履公庭年未

六十五子聯售邑侯李仙洲聘掌昌江書院

鮑如愈號雙溪明進士文宏曾孫學期實踐不事浮藻以明

經任吉水縣訓導啟迪生徒多所造就乾隆丁巳過

單恩馳贈父宗易修職佐印

人物列傳四

文苑

宋

朱震字伯起一字振甫北隅人倣儻自負尤豪於詩熙寧丙辰進士初未遇時遊京師會大雪朝廷宴外國使人於樊樓客題詩主者幾不能敵既撤宴震登樓題其後曰昨夜狂隨汗漫遊彤雲遮斷六鰲頭翻身跳入銀宮闕撼碎榆花遍九州覘者奏之上大加稱賞以白衣送銓除不應詔遁去可以見其氣岸云及登第授迪功郎後官工部郎中汪肩吾字均山兩赴舉不合遂不仕後辟蔭皆不就著有昌江風土記

江風土記



元

鄭蘭玉有文名尤長於樂府以薦授山長擢南陽路知事又  
以薦授翰林應奉文字國史院編修官著有草石樂府集

明

方清字廉夫震之孫也嘉靖戊子領鄉薦任通判平生肄力  
於詩歌古文詞諸所撰作擅名一時

朱昭字克彰北隅人練識故實有文藝不求仕進永樂間聘  
纂察邑志

徐為善字日新聰穎博物宣德間鄭隆叅議廣西延為館賓  
有例許就彼入試已酉遂冠多士廣士嫉之誣以獄上書  
獻詩獲貸歸遇大比有勸試者謝曰昔欲仕而激之隱今

已隱而可強為仕乎不起著有西遊稿楓林稿今佚

汪心一字爾清桃墅人邑庠生少儻有遠志請於古今具  
文武才書劍皆精妙大字尤擅譽江南北明李居源溪治  
醫方博涉內典並窺其秘

戴欽字爾峻北隅人髫年遊泮試輒冠軍文筆縱橫駘宕頗  
近大蘓性溫而潔時人仰其厚德高風康熙壬寅 恩貢

李從先字傳子思謨子也弱冠即食簞純謹有父風應試暴  
卒邑令李濱臨之曰責躬至厚待物至和所就不遂傷如  
之何世以為確論

人物列傳五

孝友

宋

宋之才字亮采里仁都橫田人父歷官韶州司戶留之才與  
母居歷去為盜所劫以之海上音遂絕去時之才幼方就  
塾學而母全氏有賢行知書之才日習於師夜則全然松  
心自課之才亦性孝而敏既長工文史厲風操元豐壬  
戌登黃裳榜進士第試館職擢集賢校理遷秘書省正字  
迎母至東都母曰天下豈有不能為人子而能為人臣者  
哉之才感泣即日陳情乞解官踪跡其父乃如粵東匍匐  
嶺海久之遇人從海船來言日本國唐人街有宋翁為司



市之才詢其年狀疑即父請於海巡駕洋而往果得父日本吏知為天朝貴人聞於王王以節幣召之才辭曰之才以親故未上國禮人臣無越境之交其敢邀厚聘以自取戾王嘉其有禮遣還初歷與全約曰來年荔子丹迎汝踰期無音全因種荔枝核私囑曰倘夫返爾生芽隨菱甲成樹及歷歸荔子丹矣後黃裳上其事於朝之才得復召終秘闈修撰

甯從龍幼有至性事親以色養嘗刲服療疾事聞詔旌之授徵仕郎

元

呂武峯有孝行至治二年前受旌

余仕英字大壯籍波人賦質英敏胸襟灑落酷喜梅自號九梅主人元季兵亂負母逃難六年艱苦備嘗孝敬彌篤每有感觸輒鳴之詩著有九梅集其孫余聰亦以文詞著

明

汪琬字齊安克復子也十餘歲而孤治喪以孝聞克守家學博而能精洪武間舉人材授金吾後衛倉大使念繼嫡母在堂每南望飛雲輒歎歎不能自已乃就寓館額曰望雲軒國子助教萬鍾為之序學正侯復記之皆推為純孝學士大夫多以詩紀其事後卒因思親故自免歸

張煥然父信立洪武初坐註累得罪且死煥然詣闕請代上憐而兩赦之攜李楊昇為之傳

李信中三歲孤母與叔姒黃氏忤黃乘夫在卧因事給母入鑰戶誣以姦母不能旬縊而死信中年十二知之泣誓母墓而行傭抵京師訴於朝文皇嘉歎黃死欲授之官信中辭曰乞歸教母上手摩其頂曰人家乃有此兒取黃帛親為裹髮資之歸終身不冠櫛

蔡文斌北隅人永樂間弟文選悞殺人文斌憐其未嗣而已有二子出代罪獄成明年族凡鎮以貢上京訴於朝下有司覆宥之

洪信文字日升東隅人幼孤事母孝母毀衣幾絕廬墓側刻木像母事之宣德間事聞旌其門

戴顯字克晉瓠之子也宏治乙卯領鄉薦初無宦情及知寧海銳然志治尋以母在任思鄉遂稱疾歸養母卒執喪禮甚謹以孝著寧海志稱之

李瓊玉字素石里仁珠峰東麓人嘉靖間諸生幼失父事母孝母疾篤刲服食之因感異夢而母愈踰年母卒廬墓三載院司表其里門知縣汪宗伊疏聞於朝不報

王瑞父客死蜀中二兄繼往扶柩並中止卅年十四行傭往載運至峽而舟覆抱棺漂九十里獲救而免以喪歸葬明年死於水

馮鼎父鶴析產為二以授鼎及其兄昇後妾又舉四子父疾革取嚮所析分為三令鼎昇與庶弟各得其一父兄相繼歿鼎言於昇妻總前產而離為六均有之有司表其室曰



成讓

朱子忠字一之北隅人邑庠生為學精講解性至孝事嫡母曲盡子職尤謹於所生季弟弗率極力拯之閨媛不受聘絲以革俗後以孫一桂貴贈刑部右侍郎

汪宗潮邑庠生與兄宗大義不分產宗大未嗣忽得重病宗潮禱於神割服以進而兄愈後生三子

操鑿父雙瞽事之至孝從兄鼎以鬻販為生折閱多負債鑿出已貲代償之

李廷桂字子馨朴實長厚善草書好吟咏事總母以孝聞與從弟分產自取瘠薄而推膏腴讓之嘉靖二十四年饑捐穀三百石以賙貧者人稱其有乃祖原魁風原魁列尚義

傳

戴文暢邑諸生事總母以孝稱總母弟幼文暢均產讓以膏腴有司獎之

汪兼金字在鎔潭口人謙退持重與物無競兄弟分產甘取其荒頓者論者以比東漢薛包也

王宗孟字賓卿下連都人幼稟至性父喪泣血骨立母歿亦然遂合柩廬墓三載哀感行道事聞萬歷四十四年旌表朱德宗字元良北湖人性至孝邑令旌其堂曰孝友型家與弟曰首分爨有式好風時舉鄉飲賓以勵俗

王祚昌字淑荏大惟都人天啟甲子鄉薦事親至孝執喪哀毀骨立廬墓三載憂戚如一日性淡泊寡營登賢書後罕

入城市郡守張有譽表其門曰原閔高踪後上春官卒於京貧不能具喪事問舉者助之殯殮從薄以成其志云

吳文舉字是塘北隅人從伯父商於粵伯病文舉侍膳嘗葯兩載如一日客久貲財俱竭而伯死歷盡艱險扶襯歸里伯之子文明又早天文舉恤寡育孤力營其昏嫁平生訓誨子姪以孝弟忠信為本至建饗堂周貧乏雖童僕佃戶皆惠愛之明季兵起孫士鳳猝遇悍卒山谷間問姓名曰得非吳是塘孫乎慰謝而去人以為積德之驗云

金克說字澤萬英漢人邑庠生九歲喪母哀毀若成人事繼母無缺禮幼弟三人相次就學皆克說躬教之成材年二十二喪妻遂不續娶而以其力為諸弟昏父嘗謂曰兒為

弟計自鰥三十年不知古有此人否然竟不娶父卒哀慕如孺子既諸弟求析著田宅自取瘠敝而以新腴讓弟并其所自置亦均分馮里中老者以為僅見

曹天和字履卿勸義都人邑增生孝行敦篤父患瘧醫弗效天和夜叩天夢神語曰當用南星次早用之果愈撫叔孤子嫁兄幼女皆推已貲不少惜

李世御北隅人邑庠生事親至孝萬歷間教諭鄒啟光察其實以士林純孝聞於督學及巡按咸旌之且錄其名於冊每臺監行部賜以粟帛

國朝

張允發字長祥世御季子也四歲而孤撫於兄允承長食餘



郡庠以兄之愛也父事之家產聽兄經理絕不置問已娶妻生子猶依依兄側不暫離順治間避兵鄉中寇至兄以嫂病不忍棄允發又不肯舍兄去寇殺嫂及兄允發哭救願以自代遂并遇害

余敬估口都時潭人邑庠生性至孝家貧藉館穀以養而甘旨未嘗少缺母嘗有疾不解帶而侍湯藥者三月順治三年上寇起敬負母匿山中遇寇掠無所得遂刃母敬以身當之重傷而斃母賴以全

汪修齡字舞修潭口人事繼母奉養惟謹歿而畫哀殮從其厚侍諸弟如同胞敬延塾師課姪與課子無間

方繩祖字其武廷溫之孫以孝友著聞食饌府庠屢寇多士

知縣王臨元聘修縣志多所裁酌母病衣不解帶及歿終喪未嘗見齒尋父病侍疾益謹父歿哀痛成疾卒遺命殮不用絲棺不加漆以終父喪一時惜其才而哀其志

史秉直幼孤篤學力行母程孀居而能以志養既歿作哭母百韻詩刻像奉之一飲食必涕泣跪拜雖諸孫遠膝而孺慕不衰縣旌其孝舉鄉飲介賓年八十卒著有杖鄉集

史彰美長鄉都人性至孝年二十二隨父客長沙大風覆舟彰美抱父坐舟尾號天代死漂流三日夜比獲救舟遂沉時人以為至誠所感越三載彰美竟溺於洞庭天殆以全孝子代父之言歟

朱士燮石斛人務學飭身尤敦孝行甫十四父客死貴州旬

旬數千里求父柩日久金盡行乞於市哀動路人有義士某資之數鎰得扶視歸一生以早孤為大戚事母倍摯年五十又先母而亡遺命殮以衰麻時論謂士熨庶幾孝有終始者

汪元灝字凌萬國猷子郡庠生好學植行尤以義讓著少孤事母惟謹兄弟分產自擇荒頭厚資猶子麟紹遂為名諸生先姪孫婚以延其嗣受族叔託而成其孤遇人婚教名利之事不惜解金以濟貧之多待之舉火時遭橫逆理遣弗校晚歲尤以載籍自娛年七十有八卒所著家訓格言二子皆庠生次麟圖字功也世其家法孝事繼母母患沉痾別股嘗糞侍日夕三載不懈為從弟償宿逋一擲千金

至於全人夫婦活人性命萍水相逢輒傾重貲毫無吝色年終六十有二

李奕昌字韓止邑增生日滋曾孫性孝友甫十齡從父避寇鄱陽境適母死殯殮禮不備號泣欲絕事繼母得其歡心父病侍湯藥歷寒暑不怠及卒哀毀逾度喪祭之得為者悉竭其力友愛幼弟壽昌至老不析產嘗痛兵荒相繼三代停柩未塋因究心堪輿學治家接物有禮有法往往以莊見憚有叔父五十無嗣而難畜妻奕昌為任其事且以大義曉叔母母亦愧悟遂得舉二子其為人敬服多此類卒後以子紹熊官訓導

馳贈修職佐郎



黃石字亦公西隅人父欽選郡庠生積善好施長者也石早慧嗜學康熙寅卯間土寇竊發石與父皆被繫猶讀書不輟嘗請以身代父寇亦感動年十八列諸生尋食餓為文清典試常第一丁丑貢太學壽七十有九卒平生和厚與人設城府尤篤友愛析著後弟破其產復分已田百畝贍之耻言錢米而推與弗倦先後邑宰多重其品望子之瑜庠生亦以望舉鄉飲介賓

董國燦字淑輝里仁都學建人性孝且義康熙甲寅間年尚穉從祖思賢避亂鄉中突被執賊將刃其祖國燦哀號爭死賊亦心惻遂得全始嘗讀書痛父已故乃罷進取力撫諸弟婚教有成析著時田廬自取瘠敝終身樂善好施不

伐其德子廷對及孫文萊文曼守其遺澤多有聲庠序焉鄭璜字懷五長寧都人幼喪父撫於寡母稍長克承親志敦品務學弱冠為廩生文行最知名遠近爭延為師而璜以母故謝不就自甘窮約依依子舍晨昏定省惟恐無日值母病憂惶迫切刻股以進母愈且壽及歿竟以哀慟致疾卒聞者莫不感傷

吳士博字以文城門都人祖父俱刻苦力學食貧以卒母朱氏備嘗辛勤而歿士博早失怙恃其後每一念至輒悲不自勝因繪家苦圖懸對必淚下沾襟指謂子孫曰汝等當無忘先世之艱難也會家計漸裕乃新亭祠置祀田皆獨任之友愛諸季構宅使居猶子昏教靡不周至敬禮師友

五子並有聲膠庠居鄉振恤不少倦宗族頌德焉

吳立栢字松友杭溪都吳村人性孝友好義少時種學織文有聲童子試事親色養備至父病榻立栢侍疾衣不解帶祈天請代及卒哀毀踰節廬墓三年刻木像禮事如生廬僻深山有虎來衛夜山中偶失火夢中聞父呼之起遂力救得無恙時以為孝感母歿一如居父喪先是母患蠱遍醫罔效因博習方書精其術母賴以安終身語及二人已事輒不禁嗚咽涕零與兄盡懽愛貨財無毫髮私交遊中排解立決莫不馴伏苟濟於物雖破產不惜教子先德後藝其長貢生家選最知名卒年五十有九

方應聰字克柔西隅人領康熙丁酉鄉薦性孝慈事繼母極

誠盡懽反於兄弟有親盡族孫僅十齡孤苦無所依應聰挈以歸教學娶妻一一待如己子平生勇於赴義邑中大利槩每為當事直陳輿革多倚賴焉未仕卒

潘廷珏長鄉都人性至孝父患血疾百藥罔效廷珏日夜悲泣有語以此病服巨茅根便差遍訪不能得值樵人告曰屋南山澗中然多毒蛇往必傷人廷珏聞遂前果遇蛇急繞其身廷珏不懼但默念不得茅則死吾父以為憾蛇亦徐解而去取茅歸以進父果瘳久之以壽終當道槩異

鮑雙字龍吉建溪人六歲而孤哀慕慟切遂終身不如酒肉長事寡母愛若孩提母死祔於父廬墓三年嘗讀書竟阮童子試而好善無窮以施濟澤其鄉里康熙間署令祝廷



芳旌曰孝義可風六十有三歲卒

鄭觀生長寧都人少失恃繼母性嚴多病觀生任勞愛益篤躬湯藥輒踰時不解衣更二十餘年終始無閒嘗讀書應試屢躋晚歲督學使王公思訓給衣項旌其行

章其煥字喬如法京都人邑庠生植品方重尤以孝聞事繼

母愉婉承志卒得其歡母疾衣不解帶繼母疾革感且泣

曰天幸諸孫類子俾食其報吾無憾矣平生好學多藝能

治春秋通三傳唐宋儒者同異之說其餘星卜醫方徃徃

洞如專家壽終六十有九汪璉有傳

李可久字恒也東隅人乾隆丁巳歲貢品行莊恪為時典刑

而考其天性也母病久不愈侍湯藥無稍懈每焚香禱天

願以身代工於制藝課其子姪至老必自製為之式舉京

鄉飲賓卒年七十一弟可大字宏也邑增生亦以孝著事

母篤孺子慕母歿竟以哀毀致疾年五十三而卒平生高

曠喜為詩於人多所扶濟與兄可久友恭至惟人稱難兄

難弟云

江道衛長寧都嚴嵐人幼孤事母克謹母死廬墓三年康熙

間知縣程鯤化旌之年八十終

鄭懋璜字予績日藻之子康熙乙酉歲貢居家孝友父病侍

湯藥月餘未嘗假寐撫孤姪多方扶持知縣謝汝梅舉鄉

賓年七十歲

汪斐字鯁叔桃墅人邑庠生敦內行事二親先意承志母疾

割股和藥病尋愈尤汲汲先塋祀產族黨稱之無間言平生急公好義如修邑志建文武廟皆分肩其任愛涉載籍至老不輟課子孫克紹書香年終八十有一子玉錦孱生

孝友克家

汪啓元字大章桃墅人生有至性幼奉二親即知孝謹既長益虔父病沉疴割股和藥後侍母疾禱於神輒有感居喪哀戚盡誠罄產營葬地友愛兩弟至今猶摯事闈祖先及族黨間義舉傾重賞無吝色教子義方子浚初為司鐸後成進士改庶常每誠以敦實行飭廉隅平生朴誠自矢不苟言笑不識機械有然諾必踐鄉人皆推重之以浚前官定南縣教諭

馳贈如其官年終八十有四

葉玉相字向子北隅人生而穎異讀書淹洽援例補太學生兩赴棘闈不售嗣丁母憂遂究心青囊之秘妥葬先人宅兆皆卜吉壤生平敦崇義氣修族譜立支祠周貧乏不憚况瘁尤念弟基無嗣以次子宏承其後厥後長子廷裕以進士官粵東稱清白吏次子宏官部曹皆相義方之教乾隆十六年以宏官戶部時

馳贈承德郎如其官例晋朝議大夫

汪夏書字治璧北鄉潭口人幼有至性十歲時父商於外書不肉食曰吾未奉吾父也兄弟六書行三父歿田產悉讓伯仲書獨力經營備極勞苦教成三弟至補庠貢有二弟



早世待諸姪如己子其後家計豐腴盡以均分母年九十  
生養死葬不累兄弟人咸義之五旬無子撫姪為嗣其妻  
金氏力勸納妾遂生七子愛如親生邑令黃泌贈以化承  
膠木之額現年八十

程日烜字月從興田人拭章次子幼篤學稍長見父理家勞  
苦毅然曰子不克服勞雖獲名奚貴年十五分理家事拮  
据不違養親則豐自奉則薄出幹練才家漸裕人多用廣  
烜念二親去世不忍分析為之延師教讀後先入叢序貢  
明經登賢書皆烜力也生平絕跡公庭誠信孚於鄉党年  
終八十嗣子學立監生

方應傳字允紹義合都人賦性淳厚父母疾日夜侍湯藥衣

不解帶時禱北斗求以身代宗族稱之生平好義乾隆癸  
亥己卯穀貴傾囊以濟貧乏邑令楊長桂匾以年茂松椿  
旌之八十有五卒

庠生王運字景運大惟都人十歲喪父依戀孀母暨租人稱  
慈孝與弟同亨同居至老不忍析箸年終六十有六

監生李世燠字庭有東陽人性孝友母久病侍湯藥數年無  
勸容父歿苦茨三載事祖母稱順待幼弟以恩伯父喪明  
無子為約妾生子人尤高其義

童兆驥里村人其曾祖因失怙同兄育於舅氏項姓為子三  
世矣驥年十六恫念項有子孫童無嗣續欲辭項回宗項  
不許乃哀訴府主沈始得偕弟兆駿歸童項氏產業絲毫

不取與弟作苦成家時未生子乃預貯書籍曰以教後人及子如闕生稍長隆師教課見子入泮竟如其志

李日旦字又周幼失怙事母孝母病虔刻感應篇及病篤割股和藥尋愈創書屋教三弟成名嫁三妹皆如禮族中公事力任不辭年三十四卒

汪世新城門都人幼弟夢飛性慧父亨煇欲延師教之奈家貧苦新承父志一切從師應試入泮食餼之費竭力支措不累父并不累飛門內尤雍睦無間言新年六十汪內翰汪贈曰荆瑞

程作標字嘉綵西隅人家貧事親甘旨必備父歿喪盡禮母病到股和葯病尋愈兄作梅無子以三子燦瑛承總撥

產子之子國瑞郡庠生

方宏撫字良育西隅人幼失怙恃繼母吳氏養之即知孝順長而彌篤母患毒病危撫吮其臍血病旋愈吳年八十六卒喪葬盡禮族黨稱之子際璿庠生際虞舉人克世其家汪喜子潭口人自幼貧苦養親母病背疽為吮治而愈父母歿哀毀盡禮積勤為兄娶婦造屋同居兄卒事嫂如兄嫂致撫幼弟成人付百金命弟貿易弟連本俱折將屋典賣又出所積八十金盡以付弟本折如前惟歎命窮並無怨語粗衣糲食以終其身

余啓昶信口都人性孝友父大翰病痰喘昶侍湯藥經年不輟父歿事母亦如之與兄折產讓甘就瘠內外稱之



庠生吳士超字邁倫辛正都人母病刲服和葯病尋愈性好義有鬻妻者捐金贖還三舉優行士林欽之

人物列傳六

篤行

宋

陸友仁字玉汝湖田都人世居花峰下以農為業友仁始習

儒少即飭志操守正不阿領袖薦屢舉不第有子曰翰字

奎章登紹興壬戌進士是科初擢秦檜子燧第一檜以為

嫌乃首陳誠之燧次之翰因與燧善官起居注館燧家翰

頗工文凡燧所制多翰筆檜亦愛其才厚礼之燧間謂翰

曰玉汝先生不欲仕乎來須優除之遂以郟檄趣有司勸

駕友仁至臨安知出權門意傲居郟外僧舍翰趣迎拒不

往誠之亦為檜父子致殷勤友仁以衰疾謝竟不見檜而

迤比行謂翰曰還守花峰荒田數畝不失佳兒子郝嘉賓  
 柳子厚豈人所為哉檜聞之笑曰腐叟翰既日親奉氏累  
 遷翰林修撰中書舍人煇子墳又出其門一時偕族姻列  
 上第檜開筵宴客列屏為王會圖檜命賓題詩翰適被酒  
 起賦曰萬國昇和賓貢成天陸雲徹聚神京想來莫信圖  
 王會多是諧臣文太平檜見詩默然然亦不之罪也檜卒  
 煇退翰旋罷歸時友仁築室於花峰之下翰就拜榻下友  
 仁曰孺子幸來乎好去督畊課織毋廢吾家本業

明

徐文郁字晦之洪武初應遺才詔赴闕上顧問曰天下何時  
 治對曰君仁則治又問百姓如何安對曰有司得其人則

安上嘉之將授以官文郁力請養親遂歸

胡淳字叔元由西鄉徙居東隅崇正中歲貢授雲都訓導所  
 善洪一新字自新亦居東隅崇正貢一新為人梗直而淳  
 謹厚並有古風鄉里敬之淳年八十有一新八十先後卒

國朝

金鼎字象也騰鳳都人康熙壬寅 恩貢幼失父事母至孝  
 居喪一遵古禮種學砥行以授徒為業時彥多出其門鄉  
 族念闕者必勸導慰解莫不歎服卒年七十

俞日旦字曙千東隅人廩生以學行見推一時孝親愛弟門  
 內雍和建祖祠輸祀產睦族多方康熙二十一年與績邑  
 志詳慎不苟及修學宮復竭貲力以從事當道交口獎之



曹蔡字酉倩勸義都人幼受業於外祖陳大綬每期以大成後所學益粹遂棄舉子業鑽研經史敦行修潔言動不苟以孝弟力田勸勉宗族郡守翟鳳翥聞其賢招致之一赴不復往安貧以終

黃景文字仲純西隅人初為邑諸生尋棄去結廬西郊潛心經史博極群書有族人逋賦差拘景文人公庭將予杖直受不置辨當事異其氣宇顧問坊長對曰是曾為秀才者景文曰民久不為秀才矣宦笑而遣之

金之英字飛容東隅人初以文藝受知有司待以國士既錄于庠品望為諸生所推為人安貧守正棘棘不阿晚舉優行學院沈公翼機旌曰醇篤年八十卒

操其心字存也可中子康熙丁卯歲貢少負奇姿讀書日可萬言內行敦篤居兩喪哀毀動人兄弟終身靡間與人交毫無芥蒂或有過規必誠廉於取物赴義輒不吝佃人吳五通租累百焚其券且飲之杜跡公門縣令丞高其風時造請謝弗見晚授太和訓導以老辭年八十八卒

李輻先字爾員東隅人庠生為人質木醇謹介於取與婚嫁喪祭一守先民遺軌不染俗趨人稱長者卒年八十有三汪佐字左人桃墅人邑庠生少孤力學尤敦行誼持身至嚴不失尺寸而待人和恕無少長皆禮之介於取與以義應輒傾貲不少各課子應兆甚勤文學才品遂冠時流惜其早世佐德器既高晚為一鄉矜式乾隆二年

恩賜八品冠帶年終八十有六

錢中選字青子歷降都人郡庠生生有至性幼即以孝稱事  
繼母尤謹友爱弟世選不以弟歿少渝有姑適朱氏姑子  
貧割田以膳其老并為營其嫁女奩資妻戴氏無兄弟為  
外父母置祭田俾得血食於宗至於收族郵鄰賑饑償逋  
煮茶施粥行之數十年不倦平生性遠恭遜絕迹吏庭既  
老杖藜逍遙雖小生後輩必接以禮子孫教之謙和尤諄  
諄以忠厚為垂久計壽八十年以子廷游宦訓導子

馳贈修職郎少司馬凌如煥有傳

鮑宗易字贊正文宏孫邑庠生為人坦白好義內行純茂事  
親以志養親歿錫誠盡禮友於兄弟宗党稱之早鰥不娶

惟日讀書課子以為娛與人交推心置腹有犯不校翰宅  
邊地以擔先祠無德邑享年七十有一以子如愈官訓導

馳贈修職郎

朱宗文字止公邑廩生制行不苟作文有師法為後學楷模  
所授生徒多致通顯而身卒不遇以卒論者惜之

徐振文字黯如邑庠生居貧守素狷介自持足跡不入市肆  
而嗜古力學工詩歌精易理善誘後進邑之先達咸推服  
焉

邑庠侯登弼字簡臣北隅人父績燦豐財好義弼五歲父歿  
母黃氏孀居伶丁孤苦兼歲不登家道中落弼事母孝遵  
母訓奮志詩書弱冠遊庠母歿哀痛欲絕見者憐之娶金



氏賢克哀內政家業復豐弼積而能散貧乏者贈之伯父以明幼時受撫孤思敬禮終身不易教二子以義方日森舉人日亨庠生乾隆二年以孫世爵官湖北歸州知州

馳贈奉直大夫如其官

侯日森字惟林北隅人幼穎拔性尤孝友母久病親侍湯藥朝夕無間登康熙庚午武鄉試屢上公車不第遂娛志林泉吟風弄月浩如也至於延欸交遊誼篤任恤戚屬緩急來告者推與無間遠邁凡貧困者輒賑郵扶持之邑中多蒙德施焉治家嚴謹有法子孫彬彬禮讓繩尺不越乾隆二年以子世爵官湖北歸州知州

誥贈奉直大夫如其官年終六十有七邑侯黃泌有傳

姚上進字炫伯西隅人父標早世撫於母朱氏語在列女傳上進少即刻苦自樹長為名諸生生平敦孝友捐貲修祠推產贍姪與人交望之恂恂聽之侃侃久而愈可愛慕以次子循義官侯官知縣

馳贈文林郎年九十二卒

邑庠生方龍困字有上北隅人居家孝友待人誠信溫厚和平從無疾言遽色至為人解忿息爭片言立決咸服其平允生平以利濟為心倡建宗祠捐修橋道收親屬之孤寒戚黨之衰老者養之至于沒世子鳴候選州同克大其家人以為積善之慶

李大定字靜止上義都田西灣人性好義於撩源建廣恩石

橋至今稱便年七十邑令肅以耆德完修贈之子應惠庠生應愈州同

貢生胡元鑑字惟澄上梅田都人宅心慈祥性好施予周人之急并不責償歷數十年恆如一日居常謹飭和氣襲人邑中修文廟立書院濟蓮池建郡倉省館皆助重費年六十卒子起鳳起鸞俱庠生

汪含元字貞起桃墅人監生少孤事祖母及母以孝謹聞友愛弟姪而型家整肅居鄉多排解早常艱苦具幹才族修譜建祠皆出貲肩任其事至今賴焉年五十有五卒

程棫章字則占興田人性篤孝友積學弗售攻岐黃術所治立效並不責報生平慷慨好義遇人爭競常傾囊以解有

族人程某屢代單傳因貧為僧章尋歸給以田宅并為娶妻得生一子尋子以游惰致困章仍待之如其父卒以成家至建祠立祀周乏濟窮鄉邑高之年終八十有二子堂歲貢生孫學義舉人

庠生藍芳揚字聲遠長鄉都人事親孝父年九十揚年七十父疾凡湯藥揚必親調以進日夜環侍依依如孺子慕友愛兄弟雖折費而哀多益寡怡怡無間生平謹慎周詳常訓子孫以三自反遠近以盛德稱之子三人皆列膠庠京自有傳

監生藍京字於邦芳揚子性伉爽好義常拾遺金俟原主還之人有負責者度不能償欲以身殉京代了之居景鎮五



方襟處值歲歉民饑當事賑粥京捐金飲助病者給醫  
人高其義年六十祖父俱存時有三代同垂霜鬢四世並  
累青矜之頌子侃庚子舉人大其書香

朱宗廣勸義都人質直醇謹事母以孝聞有叔死遺孤甫週  
廣撫養婚娶分產給之族有不能婚葬者解囊資助鄉里  
貧乏者至借貸周卹其好義類如此

監生黃騰高字元彪湖田都人幼貧由勤力致豐殷謙謹好  
禮事親以孝父疾履險求奇藥愈疾人皆賢之性好義邑  
中公事恆捐貲不吝子士拔國學生

監生金雯字澤章廷奉都人樸茂端方孝友無間有幹才運  
以謙謹鄉里爭聞者得一言輒解年八十子孫繞膝邀沐

皇恩緇米都人榮之

庠生孫瀛洲字榮賓東隅人明御史安曾孫有至性事親孝  
母先歿哀戚悲傷見者墮淚父病痺飲食起居必躬自奉  
侍及卒悲痛如喪母時篤友于有弟分析已久弟死于未  
週收養教誨一如己子性好義有緩急告者傾囊濟之故  
信義孚於鄉黨至於修宗祠輯族譜延師課子皆竭力完  
成乾隆二十六年鄉飲介賓年終七十四歲子兆弼國學  
生

林士鑽字總文職監生天性孝友慷慨好施常周人急不責  
償亦無德色凡遇公舉勇往力任乾隆十一年邑修文  
廟鑽捐貲督勤邑令李仙洲有記又武廟郡倉書院俱

捐資助成值歲饑穀貴減價平糶子二人長大崇宦福建  
鹽大使遇

覃恩贈修職郎如其官次子大權現任江南鎮江府經歷

汪兆顯字在茲梓舟都潘村人積學不隸家貧兄弟析爨顯  
授徒藉館穀養二親親歿喪葬盡禮待諸姪尤篤為之婚  
娶遇貧乏告者量力周濟現年六十有七人稱長者

貢生侯世俊字岱一北隅人日森子性慷慨好施兄弟五人  
二三五早卒四世爵久官歸州俊主家政無私蓄事母以  
孝撫孤寡以慈待人渾厚和平不設城府族有家貧無子  
者以婢妻之俾克嗣續邑中公事如文武廟郡倉書院等  
項皆倡首捐貲碑摹疊載歲歉減價平糶煮粥賑饑乾隆

二十三年舉鄉飲介賓

監生汪邦俊字見三批墅人家道饒裕恆以利人濟物為念  
有貧人告糶者隨時輒應鄉里不能葬娶者為之資助並  
不責償橋梁祠廟倡首修建不惜重貲生前懿行甚多歿  
後人思慕之

黃應華字美如西隅人性鯁直嗜讀書早年失怙事母克孝  
貧不缺養重行檢慎交遊課子嚴摯日自謀生夜則口誦  
諸子隆師致敬推重先達後慨先緒捐修宗譜立祀產親  
隣緩急減膳相周省館紹文書院皆捐貲輸田邑令楊長  
桂舉克鄉耆儒學崔兆麟嘗撰實行壽言卒年八十子兆  
鳳國學兆應邑廩生兆鸞職吏



監生施璠字師玉杭溪都人嗜學能文賦性慷慨乾隆乙酉成子歲歉米貴捐貲貴市賤售鄉里德之浮北多為盜柴生理貧者先行稱貸俟柴價償還丙戌溪水暴漲柴盡漂流璠憫其折本凡所貸悉焚其券至營瑣十四祀產修徵鏡通衢道路及分山開渠纂修宗譜善行不一皆出自誠心年七十道憲秦承恩贈以賓筵譽望子中蘊貢生中繡監生孫緒賢廩生

查永朴字尚質尚義都人賦性端方秉性純謹治家勤儉處族公平生平取與一介不苟人以厚道推之子集炯克肖父風孫璜邑庠生

金玉奎字亦雲北隅人幼失怙恃與兄弟相友爱由勤儉漸

裕而寢多益寡族戚恆沐其德安葬祖考不累諸姪修祖祠立祀產置義田皆倡首捐貲尤延師課子極盡誠敬年七十邑令黃贈額曰盛世耆英舉克鄉耆子二人如蘭邑增生

方德萬字君德西隅人居心恬退處事端方敦倫飭紀樂善好施乾隆十三年鄉飲俱賓年八十一卒子鴻基貢生且郡廩生宏道從九品候選

鄧以忠字衡佐先世為盱之南城人自其祖申酉避居來浮遂占籍家馬忠內行醇篤孝友性成父老病瘡甚起居不寧一切扶持剛膾躬親任之父憐其文弱戒勿前忠無少懈事母稱孝母性畏爆竹及卒春秋辰墓戒子孫毋近墓

施放其善承親意久而不忘性篤友愛兄歿視不啻忠撫  
曰得無以諸孤故乎是誠在我遂曠厥後姪林習舉業膺  
歲薦忠之力也教子夔琴以義方乾隆壬申成進士官蜀  
中迎養秦江甫入境慕人歡呼郊迎忠釋然曰吾無憂矣  
及調江津平反數冤案忤司臬者意或勸以往謝得解忠  
不命往曰為民請命雖不官何傷久之獄定忠慨然曰可  
以歸矣及歸囑琴曰汝清介如此恐不利于仕路萬一客  
蜀不能即歸當就西席以資館穀切勿供刀筆記室役家  
居以禮率後人期望必令相揖教以禮讓童稚受書必令  
讀小學竟曰士先器識而後文藝其明決謙慎如此生平  
賦性渾厚不言人過慎交選嚴取與儉服用邑令重其品

舉克鄉飲

覃恩封文林郎如其子官年終八十有二

庠生絕師宣字陸如舉人一麥子清介自持公門絕跡惟以  
詩書督課子孫年踰七十一堂聚慶四代膠庠邑令李仙  
洲尊其齒德舉克鄉賓

監生汪尚義字宜也夏田人有幹才尚義氣色修文廟并志  
書省館族建宗祠皆捐重貲分肩其任剛方正直爭競者  
得一言以解鄉人推重

貢生項嘉樂字君三里村人謙恭好義族黨貧乏者有求必  
應居近景鎮五方雜處值歲饑煮粥數旬以食饑者復倡  
捐市米平糶邑有公事皆捐貲贊成邑令黃繩先謂其天



性醇謹以敦善可風贈之子志烜志燦志焜皆國學孫紳  
邑庠生

監生程允震字伯治里仁都人事親稱孝待弟克友家克裕  
好施與族戚不能存立者生養死殯任之不辭邑建漕倉  
立試館濟運荷塘等項皆樂捐助士林重之

庠生吳廷侃字可式城門人孝友士博五子也天性純篤母  
患蠱年餘侍奉藥餌起居無不稱意母病篤夜夢鶴集門  
庭因取策而定得蠱之九二辭曰幹母之蠱不可貞侃便  
號泣欲絕母歿奉靈數載一如生存性好善嘗敬梓陰溝  
文註釋全部播傳族戚兄弟六人同爨侃嗜古好學家務  
悉聽諸兄弟臨歿訣云子與諸兄弟同食時有告急求貸

者便食不下咽幸兄弟無不應其求此子生快意處也踵  
行不忘我九泉瞑目矣

曹鼎玉字曰謙勸義都人學問淵博授徒里中每日必歸省  
二親父患頸疽玉吮穢血數碗疽尋愈後患足毒亦如前  
吮之及居二親喪廬墓三年孺慕無間

人物列傳七

義行

明

汪克復字顏翁柘墅人肆力經史兼通韜畧所為詩古文辭  
出入韓柳以茂異舉任池州路經歷見元政不綱棄官歸  
里至正間鄰境賊民乘亂四掠克復集鄉兵一鼓卻之十  
三年元師韓邦彥至縣引為泰幕辭弗就鑿池結亭署曰  
鷗波棲息其中洪武初聘不起年六十一而卒子琬自有  
傳

戴璿字仲才北隅人嘗從吳迂講學洪武初屢薦不起時定  
賦役法浮梁獨重於他邑璿與李叔珍等上章極言得與



他邑等民至今賴之

李叔珍東隅人李士遜新田都人黎成德樵溪都人洪武十年初定賦法浮梁額頗重有司莫敢請三人與北隅戴瑋毅然抵京抗疏真陳忤旨論死遽減築城既而雷震謹身殿上因修省寬赦於役所得釋仍勅旌為直民各發一弓令重量邑田溢數得清

金宗舜字近槐涪溪都人考授吏目為人重義輕財嘗捐貲創浮梁會館於京師至今北上者賴之

俞文通字少源東隅人以賢遷起家而好義樂施輸田百畝於祠大司馬朱一桂記其事

黃鐵闖字克文西隅人家雄於貲而慷慨慕義賙恤鄉里當

事使為萬戶長收歛有法妻李氏亦好行其德後既寡正統元年饑出穀一千一百石以助賑詔旌為義民之家

范思禮西隅人正統元年出穀一千一百石賑饑詔旌其門  
余志通籍陂人正統元年饑出粟千石以貸鄉人明年又饑復罄積以貸既而盡焚其券

彭宗孫北隅人出穀一千五百石李思文朱榮祀長安都人各出穀一千一百石吳仁周志作雲宗里仁都人出穀五百石賑饑俱正統六年詔旌其門

王昌王汝寧北隅人劉丕顯葉天倫史隆升長鄉都人方志權里仁都人俞憲清下連都人程尹生辛合都人蔣思明錦義都人汪克敬長安都人景泰三年各出穀一千一百

石賑饑詔旌其門

汪彥文常尚都人李一中界田人胡海寬上梅田都人天順二年各出穀五百石賑饑俱詔旌其門

李原魁東隅人金巖振北隅人成化三年各出穀一千石賑饑鄧京惠里仁都人二十三年出穀二千石賑饑俱詔旌其門原魁洪武間所旌直民叔珍孫也戴恭簡珊贈以聯云喜膺綸綍雙旌表難得公孫兩布衣孫廷桂自有傳

鮑載成福義都人樂施金嘗砌白馬橋

方濟業字子信長安都人嘗出己貲建橋梁構諸嶺序砌路

萬餘文

葉克泰北隅人有累胥攜百金輸官遺其家克泰得而置諸

神龕守來還之

吳文貴樵溪都人賣菜為業有徐生者就取蔥而遺袖金入兩去久之文貴檢得曰賣菜人豈宜受此馳以歸其主

閔聯芳北隅人捐金建益源都利濟橋朱湘景德鎮人出貲助成南門橋邑人戴錄俱有記

沈良佐字少溪里仁都人以監生授光祿寺署丞嘗捐貲造巽峰文塔邑人方祥有記載學校志中

金文經東隅人方學道字子受西隅人俱監生文經任中書

學道任署丞皆裕於財每遇荒年各輸穀以賑有司義之

江總新字以恒長寧都人萬歷間邑庠生殖學樹品力務任

恤嘗創偕樂倉於里中捐貲積穀賑救貧乏教子孫以義



方著有家訓十三篇

金興北隅人晚年好施捐金建寶積寺殿有夙負者嘗焚其券

戴希斌與徐姓某善指腹締婚未幾徐死無子其女方晬希斌携以歸撫養為媳徐遺女奩田二十畝輸之學宮

汪偉字汝奇桃墅人居鄉輕財好施慷慨有節尚天啟間建德饒城渡砌石橋輸之千金同時其族宗魯亦以千金應有司聞於江南院道兩旌之並授義官

張大來仗義好恤凶年施棺木百具襖百件知縣王某獎之純廷惠福義都墩口人早失父事母盡孝萬歷四十四年除夕道拾遺金七十兩立俟其人俄新正都袖客吳衡偃偃

然奔至覓無所得詢與數符悉還之且留度歲次早拜謝而去崇正九年饑倡衆出穀贍其族平生醇謹忠厚樂善不倦知縣蔡屏周傳元初歲旌之平年七十有九

張廷桂北隅人郡庠生崇正九年出穀一百八十石賑饑有葉新祖者皆篋工領穀二斛佃戶朱冬短穀數皆夢為神責十五年大疫施棺一百十七具

李思袞字自職大欽孫邑廩生少負奇姿有志尚賙貧卹乏崇正十四年旱饑捐百金買米貯明倫堂告學師散之邑人相效出貲市米全活甚衆年三十七卒未成其志時論惜焉

國朝

澤州縣志

卷之八

人物志

四

朱朝璉字宗商儒林都人早失怙恃子然自樹平生睦族恤鄰扶困周急行義至勤有汪鏗者因貧出妻捐金全之歲荒流民劉鳳鸞其子價交券入將行母子戀戀哀而還其券并與之價其他事類此甚多年終六十有八

黃子尚字以義里仁都人和愷而好施順治四年斗米千錢炊粥食饑者存活甚衆建懋亭焚通券義舉多端其厚資兄姪嚴課子孫里中羨懿行焉年八十餘卒

曹一彬勸義都人敦實行樂於義施順治五年歲饑米貴一彬散穀先族次里概不取償祁門汪玉喜其戚屬也土寇盡殺其家七人而執玉喜以歸一彬慨然出金贖之且厚資玉喜俾葬其死者祁人至今以為美談

曹一鈞字惟和勸義都人多幹畧好立節槩順治間土寇搶攘一鈞多方綢繆族人恃以無恐或竄避一鈞出必後入必先卒全其宗所携譜牒不暫釋寇平後以葺先祠培祀產屬其弟一璠有司旌曰惇族睦里

黃道淳字淑正西隅人性素有守順治七年獨步河干拾遺金一囊坐待至暮遂假宿於舟夜將半聞哭聲甚哀急起問故自稱鄱陽猪販高大成畫失本貲三十七兩數果符畫還之留款達旦而別又嘗施金竹塢口山為義塚知縣吳邦基追立有碑道淳初艱於嗣其後子姓頗蕃衍壽終九十有一

汪日信字惟義仁壽都人勤於任恤撫孤賑貧鄉稱義士嘗



行賈鄱陽道遇徐某逼於債將自沉日信立出重貲活之  
又與兄日孝捐金成梁勺溪上

朱士見字於郊北隅人有不自封夏粥冬衣樂於施與康熙  
間嘗就煉山倉塢各通衢捐金闢道構亭以便行李年終  
七十有八

李光朝字遂生下梅田都人庠生殖貨財喜賑恤嘗因族兄  
無後墓墳建祠捐費不貲撫同姓孤授之室代宗弟培穀  
富妾為吳順汪泰娶並延其嗣造橋除道率多義舉

馮東字誌美抗溪都人邑庠生積學種德家故素封義聲尤  
著康熙三十五年出穀六百石賑饑蓄內嘗苦宿賦追呼  
不前東輸白金百餘了其逋不索償設渡通津行李稱便

錢米出納徃徃陰施其惠更為貧乏所感

施順璋字左玉抗溪都人讀書好禮富耻自封康熙三十五  
年旱饑出穀千石以賑建永濟亭於通衢歲小歉六月間  
輒炊粥食餓者行之終身以為常

朱珏儒林都人慷慨好節尚康熙三十六年發粟賑饑計口  
授糧貧民賴以存活者數百餘家

汪達泰字泰來夏田人耿直尚氣節以義率族嘗倡建祖祠  
劉己田以供祭祀康熙間會歲小歉民苦積穀通負達泰  
竭金代償槩不計還至今里中稱好行其德者猶曰達泰  
也

金宗麟字文若騰鳳都人邑庠生篤於友愛弟病躬親湯藥

數月不寧輸田孔道以療饑渴行路德之

汪逢順字天一桃墅人邑庠生多幹畧慷慨自喜嘗捐鉅貲造官溪石梁修徽池往來峻嶺每歲數月就醴亭炊粥濟饑歷數十年不替行旅頌德

曹鼎遂字吉云勸義都人讀書好義其舅氏朱某疾革以孤茂森兄弟託鼎遂當是時茂森僅二齡而其弟未晬鼎遂經紀喪事提携二子昏教成立又為嫁其女壘其妻始終不渝從姪維彭維徵貧無以娶鼎遂授之室程德生獨子也父慶逼於債鬻之鼎遂捐金贖使歸不責償至若夏煮茶冬挾纊施棺殮骨行息振窮至今鄉里稱善人焉

李錦菁字其惶下梅田都人庠生惇睦喜利濟其族弟錦純

族姪沫森皆有孤兒依錦菁撫育成立康熙四十一年民饑施粥三月四十六年六十年又各施粥兩月建石橋蛟潭上名曰免涉

蓋金章字子實長鄉都人郡庠生性好義恤不封已以為富康熙四十二年夏米貴炊粥賑饑景德鎮嘗大疫給藥活多人死者助之棺凡渴飲寒衣砌路建橋捐貲折券德施特廣然平生嗜古務學友愛兄姪甚篤尤兢兢以新宗祠拓祀產為急非徒慷慨博名高也

林永威字惟茂湖田都人幼稟重厚以勤儉拓其家而樂施賑窶人余某驚妻永威完之且厚資其生恤鄰膳族闡道成橋捐金靡愛平生未及力學而敦士行門內穆穆教子



孫尤有法書香遂振

李成沅勸義都人有幹濟修睦好恤嘗以租田百畝為本殖  
具息漸至豐盈廣市租產族之貧者贍之向學者延師課  
之一宗無失養失教者庶幾古人義莊遺意焉

李人龍字淑止東隅人庠生情慤德滿推解不吝值穀貴時  
輒減價以糶理紛息爭一言立判然人龍至性過人敦孝  
友嗜學經術裕後不僅以尚義著

閔宗立字叔元西隅人起家儉素而樂賑恤有力降都人凌  
旺負債鬻妻媒議既定值宗立指囿以贈夫婦得全又黃  
壇藝道義亦以通故不保其室宗立解金完之其好義多  
此類課子嚴肅長嗣遠有名賢書時尤題其家法

程步進長山都人慕義樂施康熙六十年大旱出粟二千石

賑饑復建樓前亭炊粥食過者嗣後就亭煮茶以為常造

諸橋多解重賞步進始嘗力學虛試未售早繇不娶課子

自娛晚喜焚香讀易有儒士風卒年七十有七

朱世錫長安都人勤儉起家而喜利濟嘗出多金倡砌小雨

嶺石路掩骼葬骨施及遠客

鄭三陽長寧都人嘗修樟桂渡架護龍橋構亭華巖山諸處

就飲渴者皆歲為之捐砌石斛嶺七星均石路費特鉅然

三陽少孤起家寒素為尤難得也

方珣字上也長安都人父篤疾六載竭力左右不少雖兄貧

且艱於嗣分之田宅又為置妾友愛至老無他族之無力

昏喪者助之遇爭訟開解必力人服其公義雍正八年舉充鄉飲僕年七十一歲

鄭日高字仰如長寧都人積財能散勤於義恤康熙六十一年大饑施粥三月捐貲修花橋砌高坦嶺路助昏掩骸善舉特多

鄭應元字三及大定子也家貧事親竭力後稍豐子道彌謹親病請代以身性尤好義置橋梁平道路煮粥賑饑行之無德色嘗逢拾遺金訪其人還之有爭訟者每藉片言為解雍正間舉元鄉飲僕二子一孫俱列膠庠女孫曰節貴幼字汪之浩將嫁而汪故矢志居貞時咸以為乃祖盛德所鍾云

鄭景紹長寧都人好善輕財嘗捐重貲倡修凌村諸處道路又若造舟梁施棺舍炊糜煮茗以療饑渴行之如不及者貞生侯雯瑄字韵遠歸州牧世爵子渾厚和平人不知為貴介尚意氣篤交遊性伉爽遇歲歉平糶賑饑見人艱危解囊濟急邑中公務竭力捐助造舟梁施棺藥行之最久鄉人德之

庠生吳雙字上玉城門都人性好義見村墟四面山路蹊險行人苦之雙家不甚豐歲出穀百餘秤春末夏初散給農人秋收畢各按穀赴工開成坦道已歷十餘年又恐久而或替更立田租六十秤囑子孫歲收其穀為修理費其餘善行不勝枚舉鄉里多薰其德



江士潤字德章長寧都人幼敦孝及長由勤儉致饒裕樂行善事造金沙灘口橋捐金二百於誥峯要路建亭以息行人輸租入祖祠以供祭祀里人賢之

庠生汪允龍字雲章桃墅人賦性義俠值歲饑捐囊買米以濟鄉里有族人墳墓被侵出千金爭復之施棺槨修橋道建祠廟恤孤寡其誠信一鄉推服

黃其信字實也西隅人敦孝友篤任郵家不豐而性好義乾隆八年歲饑縣請糶常平倉穀糶者日至萬餘人一廩給發日不及五千人遠人守至晚不得歸怨咨沸騰其信煮粥食之傾囊罄產不少間邑令高其義造廬謝之旌以匾曰益人皆惠邑進士鄧夢琴有記

夏德祖字汝明下義合都人勤苦自勵正直待人有盜劫孤高賞本德祖拒而還之商謝以金不受與兄弟分財取瘠讓肥生平好義族黨咸沐其惠年逾七十卒

監生侯雲斌字憲文北隅人生母早逝事繼母以孝聞友愛諸弟弱冠父委代理家務斌克勤克儉家產日擴凡有公事靡不樂從常欲捐田入義學以佐膏火未果病卒乾隆四十七年五月妻葉氏遵遺命捐田二十畝計租二百秤輸入紹文書院呈縣存案葉氏見節婦傳

監生錢大傳字公習力降都人幼失怙教於母性慷慨見義必為兩開南山通衢再造板冲石橋費數百金又施藥材舍棺槨建亭施茶敦族鄰隣懿行甚多人咸稱之

朱之納辛田都桃源人幼孤育於姑丈程氏及長歸里辛勤貿易致家豐裕不私其有修余家龍路造戴村嶺脚溪橋又每歲置冬衣百件以濟貧者人皆德之年八十卒

查榮振字公麟尚義都人力勤好義村居驛橋傾壞屬徽鏡通衢倡衆修造又程村陽古墓菊有大樹數株村人售價斫伐訟於官榮代償樹價立議永不剪伐庇及古墓蔭及行人口碑載道

庠生施治光字齊梅杭溪都人貢生定子績學弗隳家不甚豐躬自儉約以餘貲周窮乏為人有幹才多義行為族建石橋勸青雲閣立義館延師擴瑣十四祀產與祖祠寢室年七十邑令李游德贈以耆英卒年七十有一子珣有傳

墩廩生

李有崙字信也東隅人勇於行義為保祖墓以已田易山捐貲以砌嶺路貧者借貸無不立應歲饑平糶人賴以濟邑令楊旌以直義遺風年終七十有五

金文會字子元英溪人秉性忠厚好義樂施於引京都建三陽橋費五百餘金於涪溪都夏家源建雙連二橋費四十金鄉里咸稱盛德

州同程聞德城門都人幼時生母死事前母陳以孝稱性謙厚好義乾隆十八年嘗捐貲買米以濟窮乏遇人有難解之事即居間賠償以息其事年四十一卒邦人士惜之

金國榮英溪人文會子在涪溪都大嶺上建雲霞庵輸田十



畝五分付僧燒茶以濟行人在佐口都小沂源建夾鏡橋至周貧郵乏延師教子尤盡心力弟國寵子天賜國學生翔貢生克世其家

鄴宗斌字允全錦義都人樂行善事倡建胡家墩石橋助天寶渡船隻修南峰嶺山路皆費不貲邑令沈嘉徵聞其賢舉鄉耆年踰七十而卒

貢生詹仰賢字伯英辛正都人樂善好施辛未丙子歲歉米貴賢偕同志貸粟平糶歷年修治山路計八百餘丈建橋施渡修祠宇置祀田種種善行至老不倦

監生胡志魁字元甫福義都人幼貧積勤成裕性好義施渡橋至老不倦年終八十子三人鎮邦厚生

浮梁縣志

人物列傳八

耆德上 鄉飲另入列傳者此不重載

明

彭璣字肅之北隅人嘉靖間歲貢為溧水訓導能賦詩與人無疾言遽色知縣汪宗伊禮之年九十歲子藩亦年八十有七

文盛字應奎方正恬靜喜讀書尤精韻學舉鄉飲年九十歲梓舟珠林趙友善舉鄉飲鄭三俊倪思輝張御史額序贈之朱一光字惟德性質樸慕義義輕財舉鄉飲年八十七歲

沈英里仁都人克鄉飲賓有司賜粟帛年九十六歲

方時秦字惟謙西隅人屢困場屋子鳴盛領鄉薦遂隱居益為德於鄉一時推重舉鄉飲賓卒年九十有四

江標字立之長寧都嚴歲人務記覽明理工文抑於有司性好義施予不倦為鄉里所推嘉靖間鄉飲

江黑東隅人古貌古心崇正二年鄉飲年九十七歲

洪圻字右宇居仁都人少嗜學能文章親賢好善老而彌篤鄉里推為典型年八十八歲崇正間知縣盧洪聲舉克鄉

飲奉例冠帶

金維坤藤鳳都人忠厚古樸捐田立祭散穀濟貧崇正四年署縣巢之梁舉克鄉飲

鄭際逢長寧都人嗜義勤施年八十六歲崇正十五年鄉飲

知縣朱應暘旌之

鄭禮貴長寧都人長厚見重於鄉崇正十五年舉克鄉飲介年九十五歲

國朝

朱邦儒新田都人順治四年以齒德舉鄉飲知縣李秀龍旌曰鄉評允孚

葉際暘字德煦北隅人邑庠生好學慕義嘗出粟賑饑而律身嚴潔兩與鄉飲監司旌曰廉貞壽終八十有六

俞尚恭東隅人周急撫孤督工葺城捐貲修學以義耆聞舉克鄉飲介給冠帶署令楊鸞旌之年八十而卒

史彰仁長鄉都人訓導贍之父也教家有法以忠厚鯁直孚



於鄉曲歲饑賑濟多所全活舉鄉飲介年八十有一

劉國相鎮市都人舉鄉飲介年八十有一卒

劉文昇鎮市都人訓子睦族悖尚孝友舉鄉飲介年八十卒

潘宗義長鄉都人性忠厚淳崇古誼潔已型家皆不苟舉鄉

飲介年八十卒

金慶文字季蘭北隅人邑庠生蚤擅文譽長於詩品望端重

康熙間舉克鄉飲介年終九十有五

劉大祥字征吉里仁都人淳古不與華競康熙間鄉飲僕卒

年八十餘

方仲字震如西隅人郡庠生雍正元年鄉飲介賓

鮑時卿字汝相福義都人質厚和平樂於為善葺亭繕橋不

惜揮金鄉里薰其淑德雍正二年躋百齡形神益固有司

以聞奉

旨建坊表曰昇平人瑞壽終百有四歲

方應桂字汝攀西隅人幼失怙事祖至孝平生兢兢自守急

公好義以親睦族鄰為務調貧乏不惜解貲一鄉推為善

士雍正八年舉克鄉飲僕年終七十歲

汪日運字振文批墅人邑庠生性孝謹嗜讀書型家整肅教

子世隆世陶並成雋才惜皆早夭雍正十二年舉鄉飲賓

汪文儀字孚萬夏田人庠生經明德懋雍正十二年鄉飲介

閔紫字仲晦西隅人邑庠生學老品優乾隆二年延為昌江

書院師造士多成才俊舉鄉飲賓

藍爾愷字子仁長鄉都人性孝及嗜學因試弗售以詩書嚴課子孫愷為人渾厚和平胸無城府德器純粹鄉里推為

祭酒雍正八年舉克鄉飲子四方揚庠生三貢成均孫曾

玉立侃舉人咸以為盛德之報年終九十有七

臧有幹字又年尚西部都人邑庠生康熙間鄉飲介年八十

四歲

金管字克讓引京都人郡增生雍正六年鄉飲介

張世家字仁伯上梅田都人雍正六年鄉飲僕

章和聖字辰如西里都人雍正七年鄉飲僕

朱祖思字允惠北湖人邑庠生雍正八年鄉飲介

江有生字茂育辛合都人雍正八年鄉飲僕

鮑孔瑞字輯公福義都人雍正九年鄉飲僕

吳宏瀚字浩如里仁都人郡廩生雍正十年鄉飲介賓

計中和字亦坊西里都人庠生雍正十年鄉飲介

鄭紹虞字若唐騰鳳都人雍正十年鄉飲僕

沈大鵬字凌雲里仁都人雍正十年鄉飲僕

朱問仁字克復北湖人邑庠生雍正十一年鄉飲賓

金之源字少泉下長源都人邑庠生雍正十一年鄉飲介

王起需字潤生長寧都人雍正十一年鄉飲僕

程世振字子麟里仁都人庠生雍正十二年鄉飲賓

汪文燦字成章枕豐人邑庠生雍正十二年鄉飲介

朱大珍字席儒儒林都人雍正十二年鄉飲僕



金章字淑旂引京都人邑庠生雍正十三年鄉飲賓  
詹際珩新正都人雍正十三年鄉飲僕

馮世燾字叔晦旣溪都人邑庠生乾隆元年鄉飲

甯有偉字公義南村都人乾隆元年鄉飲

程復字中行龍田人邑庠生端莊持已寬厚待人乾隆元年

鄉飲介

章震巖字克如法京都龍潭人篤厚忠信樂善好施乾隆元

年鄉飲僕年七十有一子士英貢生

吳鼎新字清萬辛正都梅潭人增廣生乾隆六年鄉飲賓

朱桂芳字藉符儒林都人邑庠生乾隆六年鄉飲介

詹國委字季明辛正都人乾隆六年鄉飲僕

方天錫字懷也西隅人邑庠生乾隆七年鄉飲賓

董廷對字肇周里仁都肇建人邑庠生乾隆七年鄉飲介

胡承煜字惟烈居仁都人乾隆七年鄉飲僕

李大勳字子懷下梅田都人監生乾隆二十一年鄉飲介

李柏齡字新如東隅人邑庠生性孝友文名重一時從遊者

率遵矩範邑中公事捐費任勞必底成就精醫理兼施九

藥乾隆三十三年鄉飲介年八十卒

朱兆怡字碧園儒林都人樸實真誠胸無城府以勤儉起家

雖豐不易其素斃年常携農具歷阡陌課桑麻坐卧長林

怡然自得於鄉鄰多所周卹以詩書教子孫乾隆三十三

年百歲奉

旨建坊額曰昇平人瑞百有二歲卒

劉光葆字其耀鎮市人監生幼事孀母以孝積勤致豐勇於  
為義捐修祖祠并建寢室以祀婦女又於周家渡落馬橋  
勝梅亭建橋構屋捐田施茗紹文景仰兩書院皆倡首伙  
助年七十舉乾隆四十六年鄉飲介

張日暹字旭昇辛正都人敦孝友篤信義捐膏火於家塾設  
里倉平糶貧民乾隆四十六年鄉飲僕子慶熊歲貢

王曰亨字景會大惟都人忠厚和平與人言訥不能出諸  
口早失怙事母克孝敬兄如父合巹終身年七十足跡不  
入公庭乾隆四十六年鄉飲僕子紹漢監生

汪廷彰字德友興里都人乾隆四十六年鄉飲僕

鄭天產字亦僑隴源都人乾隆四十六年鄉飲僕



浮梁縣志

人物列傳八下

耆德下 老壽統此

明

李彥恭東隅人九十六歲成化間奉例冠帶

胡容清里仁都人九十三歲成化間奉例冠帶

唐時中南隅人年九十歲成化間奉例冠帶

曹德隆字蔭德勸義都人年九十歲成化間奉例冠帶

黃玉琳里仁都人年九十一歲宏治間奉例冠帶

汪懋南隅人年九十歲宏治間奉例冠帶

胡鼎西隅人年九十歲正德間奉例冠帶

孫璋東隅人年八十一歲正德間奉例冠帶

閔惟惠北隅人年八十歲正德間奉例冠帶

曹文寧字凝泰勤義都人年九十三歲正德間奉例冠帶

盧以侃東隅人以善良給冠帶年八十一歲

章璿字叔振邑庠生博學能詩文奉例冠帶年八十五歲

洪岳字東昇居仁都人質樸行醇年八十五歲

鮑統福義都人性長厚美鬚髯當嘉靖間宗族廢學統輸貲

激勸其後人文輩出年九十有一

王莊大惟都人幼讀書言行信謹年八十九歲嘉靖間有司旌之

李考祥東隅人公直負一鄉之望人信服之卒年八十有五

黃軫里仁都人行孚於鄉年九十歲

黃琛西隅人年九十五歲奉例冠帶

鄭鏗騰鳳都人萬歷間禮部儒士奉例冠帶年八十八歲

王朝正大惟都人年八十七歲天啟間奉例冠帶知縣蔡屏

周旌之

朱撰之儒林都人幼習儒鄉黨推其忠厚年八十四歲崇正

十一年奉例冠帶

吳雲祖北隅人謹厚為鄉里所推年九十六歲崇正十六年

知縣徐有佐旌之

國朝

王重陽下長源都人年九十七歲康熙十一年奉

恩荷賜綿帛米肉

金潤下長源都人性慤直樂善務施年九十無疾卒

李汝謙長山都人平生公直一鄉推服嘗推己屋作享堂倡

修家譜知縣蕭蘊樞序之旌曰德隆耆碩年八十卒

汪自達字通甫桃墅人積德務施詩禮傳家子姓守其義方

康熙間知縣徐宏祖旌之壽終八十有二

吳時廣字伯起杭溪都吳村人制行完粹典型一方年八十

卒三子立極立柱立栢立極字建有八十一歲立柱字惟

石八十四歲生平葆和守素並以貞白稱時人羨其一家

德壽立栢自有傳

閻士元字君首西隅人性耿直以孝友訓後人康熙二十八

年與沾

恩賜絹米年八十三歲

汪日信字孚言桃墅人庠生厚德古風一鄉矜式康熙間知

縣程鯤化獎曰品行端方年終八十有一

鄭大定字以靜長安都何洲人性淳厚莊以範俗家故清貧

而好施與都里往往有待之舉火者外舅姑不嗣衣食葬

祭始終任之年八十卒子應元自有傳

汪家會桃墅人渾樸無華康熙間屢荷

恩賜絹米年九十六歲卒

汪有學字以習桃墅人厚貌古心康熙間兩奉

恩賜絹米知縣張震孫旌其堂壽終九十有四



汪志達字遂也義合都人讀書未偶老益耽學頗稱該洽後生多就質疑難焉年八十五歲

方曰恭字懷之西隅人磊落有節尚樂施不倦貧長德之年八十歲

汪浩遠字懷山義合都人性耿直守正不阿鄉里重其一言年八十一歲

施德恭字五一騰鳳都人性介直內行敦篤力學數奇以詩書澤其後人卒年八十有一

王時習字惟賢盤溪人醇謹喜任恤卒年八十有八

王應箕下連都人樸厚近古壽終八十有五

史大志長鄉都人素敦古處教子有方屢荷

恩賜絹米乾隆初奉例八品冠帶年終八十有八

王鳴壁北隅人和平謹飭義友素著乾隆初與沾

恩賚絹米卒年八十有三

汪球字鳴玉城門都人性純厚撫孤姪有恩以儒精醫貧不取酬乾隆初與沾

恩賜絹米年終八十有一

朱守端字惟正儒林都人家庭雍穆詩禮教子性好施成梁

唘道每獨任之乾隆二年

恩賜八品頂帶年八十一歲

汪家訓字會伯桃墅人內行修潔貌岸心冲乾隆二年

恩賜八品頂帶年終八十有七

朱之緝字顏若北隅人敦龐純固恕施中有介然之守年八十一歲

葉仁梓字琴生三里都人端慤有太古風乾隆初與沽恩賜絹米年八十五歲

李秋生字淮南東隅人抱慤務本積而能散貸不責償凡公事解金惟恐後督學使趙公大鯨旌曰洛社高風年八十

一歲

李自亭字公會北隅人好善輕財義施不倦乾隆初與沽恩賜絹米壽登八十有六康強不減盛年

閔芬字中甫北隅人邑庠生年八十八歲

吳一貴字仁卿城門都何墩人年八十三歲

金總聯字汝捷引京都人年八十一歲

吳思聰字四達城門都人年九十七歲

馮光鰲字惟三西里都人年九十一歲

朱廷鏡字克明儒林都人邑庠生年九十歲

劉應召義合都人年九十四歲

朱岳字乘御樵溪都人年九十三歲

許國林字晉賢鎮市都人年八十四歲

范淑典字筠友西隅人年八十六歲

金如銘字國器下長源都人年八十二歲

余宗美義合都人年八十五歲

汪日寧字惟安仁壽都人年八十四歲

金象鍊字德澄引京都人年九十六歲

章天嵩涇溪都人年八十六歲

閔去非字下賢北隅人邑庠生年八十一歲

馮應遂字仲成勸義都人年八十一歲

程肇禮字文中城門都武溪人郡庠生年八十二歲

潘慈生字履先長嶺都人庠生年八十二歲

甯育英字則鳴常尚都人郡庠生年八十一歲

李有功字則可新田都橋溪人年八十歲

鄭之魁字伯五騰鳳都人年八十歲

方震龍里仁都人年八十一歲

李宗極隴源都人年八十歲

余大位義合都人年八十歲

章濤字次山西里都人年八十歲

施順蔚字豹章抗溪都人年八十歲

蔣啟宏益源都人年八十歲

計定遠字西侯西里都人年八十歲

王大昭字以明大惟都人年八十一歲

趙士莊字敬也梓舟都人庠生年八十三歲

吳日超字越凡黃壇都人年八十歲

朱茂儀大惟都人年八十歲

江福生字汝萬辛合都人年八十歲

金士伯字茂新英溪人年八十三歲



金德佩字玉遠英溪人年八十二歲

林德永字肩一邑庠生儒林都古澤人年八十一歲邑令祝廷芳旌之

戴振盈字正耆名宦寶山公裔年十五康熙甲寅父被賊掠至樂平盈百計贖歸友愛兄弟調教窮苦人稱盛德年逾

八十

何閻字士彥庠生南村都柳家灣人現年九十二歲

史其大字宗聖長香都官庄人現年九十六歲八十六歲時

沾受絹米

操大麒字惟瑞北隅人秉性剛直不徇私情年九十四沾受

絹米

吳登福字天錫城門都人礪節砥行和平正直一鄉取則年

八十春秋祭掃必親登墓所家貧隆師教子故子孫鵲起

施顯進抗溪都人年九十儒學崔兆麟額贈望擬礪溪

金符璽字國珍南隅人性渾樸與物無忤幼失怙遭兵發負

母以逃歸家壁立承歡菽水年九十四歲

操光昇字平亮北隅人輕財重義利物濟人年八十九歲

朱懋松字如柏儒林都漢口人現年九十歲

鄭會賢字尚文長寧都江村人乾隆三十六年沾受絹米年

八十九歲

甯士左字魁臣長山都朱溪人現年八十九歲

凌曰海字汪如魚步都西谷人端莊持已忠厚待人年八十

九歲

吳應祿字爾康黃壇都港下人年八十七歲

李應大字輝也引京都桃嶺人與弟應定應啟應效友愛無

間應大八十六歲邑令沈嘉徵舉元鄉耆額贈孝友兄弟

啟現年八十七效八十五儒學崔兆麟贈以花萼並茂大

子霖監生

馮國珊字珮生興義都王嶺人質樸慈良公平正直年八十

七歲

汪思振字聲遠興里都人和家睦族忠厚傳芳年八十五歲

金玉炫字亦華北隅人年八十三歲

程福祖字隆祉彭村都古港人年八十三歲

甯文選南村都人居家勤儉處世謙和現年九十一歲

汪有壽興福都人守己安分待人不欺年九十兩沐

恩賜絹米

李茂滔字浩如興義都良溪山人幼嗜學能文章弱冠失怙

遂棄舉子業循例補國子學屬志訓子孫忠厚簡默質樸

暮義老而彌篤鄉黨推服現年八十五歲

馮立鑣字以盛興義都玉嶺人連年虎災不憚千里僱獵除

患鄉隣德之年終八十八歲

金玳興字子傑仁壽都人仗義疎財鄉黨推重現年八十三

歲

胡承恭字克讓居仁都人現年八十三歲

庠生方泰期字丙三勸義都人為諸生五十餘載年逾八十壯志未衰猶赴秋試士林感欽老成八十二歲終

汪應運字月生興里都人溫厚謹飭訓子以忠年八十二歲朱世珍字席有辛田都桃源人醇謹謙和鄉黨推重現年八

十一歲

馮應存字君祥勸義都馮村人儒學崔兆麟贈曰盛朝耄老年終八十三歲

陶文萬字以文豐田都人正直無私取與不苟現年八十一歲

馮天桂字丹如興義都玉嶺人遷城文筆坊考授經歷職銜勤謹立身謙和處世儒學崔兆麟贈曰仁壽長春現年八

十一歲

陳兆傑字巨臣引京都錦里人年八十一歲

方應琬字玉明勸義都朱村人現年八十一歲

朱日景字景行南隅人現克鄉耆年八十一歲

馮世賢字均達下義合都人年八十歲

汪思仲字淑友興里都人好善輕財義施不倦年八十歲扶文能字技也夏連都人質樸近仁有古遺風年八十歲

操光映字公亮北隅人敬祖和宗植墓固本年八十歲舉克

鄉耆

袁文初字復一黃壇都福鳳人終年八十五歲沾受絹米

程煜字燦文西隅人遷景鎮姚家衛存心篤實待人慷直年



八十四歲

孫應彩字子瑞三里都庫源人生平正直傳家忠厚現年八

十歲

汪思定字于一興里都東港人存心渾厚處世和平年七十

八歲

鄭啓師字堯山長寧都人持己以敬待人以恭現年七十七

歲

符時臬字造文下義合都人秉性忠厚樸儉為風年七十五

歲

畢茂武字總周豐田都黃田人現年七十五歲

方添發字玉先興義都人生平慷慨遇事激昂年七十七歲

監生符昌簡字尚德下義合都人性純樸好施與捐貲建白

虎橋又翰田三畝入紹文書院年終七十有三

王國佐字文標長香都石嶺人性耿直無諛譎現年七十二

歲舉元鄉耆

閔英壽字惟章北隅人現年七十二歲舉元鄉耆

程金梅字松友魚步都大演港人有至性善事二親父病嘗

糞母病刲股待弟姪尤篤友愛年七十五歲

汪有慶字來章星棧都楊材人現年七十一歲

王國顯字文謨長香都石嶺人生平耿樸處世和平現年七

十舉元鄉耆

甯士任字君明長山都朱溪人居家儉樸待人和平現年八

十四歲

程志鎮字安也星槎都羅漢人率真處已誠心待人年八十歲

鄧大顯字士元下義合都鄧村人正直淳樸樂善好施邑令黃泌額贈齒德兼優年八十二歲

葉時稜字槐友興福都人鄉者誠信待人樸儉傳家年八十歲廷新字惟先黃壇都人現年八十一歲

監生閔邦華字彩如持家孝友處世謙和年七十九歲葉士琳字淑玉興福都人現年八十一歲

操兆聰字明聖北馮人謹厚重義母病衣不解帶其於孝道彌篤年八十歲

監生侯世鼎字昆如北隅人稔直質朴寬厚和平嘗怡情山水深得陶柳風致年七十三歲

王尚德字聖美興里都郭園人年七十八歲鄉耆

侯兆桂字野樵西里都人重厚緘默撫姪猶子年七十二歲

吳松齡字永清學日都人為入勤謹敦本睦族年八十歲

侯一仁字惟重西里都人現年七十二歲

吳允績字鼎三歷降都鳳源人遷柏溪耕讀傳家善行不一

其尤者撫孤子贖離婦造橋修路利人利物聞無不為乾隆二十一年邑令陳大經贈以鄉閭模範四十一年府憲

額贈壽考維祺年八十一歲

洪總輔字勳臣居仁都人年八十八歲

洪國楨字子英居仁都人年八十六歲

鄭其周長寧都錦江人積學勵行表率鄉里邑令方宏智贈  
以望重耆英年八十歲

鄭文汪長寧都錦江人事母至孝友愛尤篤乾隆四十五年  
與沾

恩賜綉米現年八十四歲

陳大球字子亮湖田都人秉性忠厚處世和平年八十一歲  
吳嘉順城門都人性仗義祖祠災出重貲倡建年已老祠祭  
必躬親之年八十九卒子雙庠生

余宗蕃字汝錫義合都人年八十歲

趙光瀚字以廣高波人少有善行老無慚德邑令陳太經贈

以熙世耆英乾隆二十七年叨沐

皇恩賞賜年八十七歲

鄧元璜字渭濤義合都人軍籍念族丁貧疲捐田辦運又教  
子成名書香不替現年九十有一

趙啟霖字天時梓舟都珠林人敬祖睦族重義輕財乾隆十  
七年舉元鄉耆邑令沈均安額旌碩德可風年七十五歲

鄧以憲字仲章下蘆田都人年八十二歲

石明麟字瑞先尚義都人誠村忠直與人無欺邑令

贈以望重鄉評年八十四歲

方元進字廷富興義都人勤儉自持年九十三歲



人物列傳九

方技

宋

李德鴻字匡宏界田人師事吳景鸞得青囊秘要精於地理陰陽之術每卜宅墓辨吉凶百不失一先世因避亂來淳梁至德鴻而兄弟多人以行稱李八公偕兄德輝卜居界田而德鴻又以其術為人決占不受酬藉摠利濟之心蓋與德輝並有隱德厥後子孫皆貴顯人以為厚澤所遺云

元

操貴持字子敬東隅人以辟為教授

一作州別

平生卜筮多奇中

耻以術名故不傳

明

查克中善皇極數每筮有奇驗一日其婦翁為治酒曰能筮之乎克中筮之皆中其精妙多類此

董德榮以儒攻醫精其術而不責報嘗曰富者吾不利其有貧者吾不厭其來

汪濟字汝揖本姓鄭東隅人天順己卯舉雲南鄉試歷宦同知善山水戴畫譜

朱重光字繼文北隅人出監生任經歷善畫喜鸛數十年後有彭生者以所畫鸛張於壁忽鳴噪其妻怪而焚之

閔觀精梅花數又能以人事占嘗有人倚傘於桑而問母病觀曰五人扶桑不治矣歸果然鄰某將出就占酒食觀曰

得食有雉無首某果有人留之飯久而曰汝雉可出至人驚曰果烹雉以無首不獻也乃出焉因語之數共嗟嘆久之

吳豹邑諸生善占數嘗遇崔聞占曰吾免墜樓矣歸果然當疾革曰吾死妻當適一無祿官後果適義官范某嗚呼使其妻能守節則生之術不驗矣此豈亦有數哉

徐瑚字宗猷南隅人成化間歲貢歷官永州同知善畫竹自題署曰道道子

姚銓西隅人善醫術多有奇驗

舒宏精針法病者爭迎致之皆服其神

王應汝善醫亦能詩所著有痘疹訂記書

孫卓三北鄉人精醫術病以意治又善診太素脉正德間嘗  
應淮藩召試藥輒效名聲大起邑令以宸濠之變先與送  
其夫人避山中病前秘五日腹脹如鼓仰而張目息已微  
急召卓三卓三曰此盛暑急驅飲水過度羞溺而胞轉也  
法以猪尿胞吹氣貫滿令婢女投入衝之而溺淋淋下遂  
起新安富室有男淋溺不止者漸痿黃諸醫束手卓三醫  
之亦弗効渴隱几生以手戲弄水灌後孔塞則前竅止開  
則通為腦後一穴灸火三壯立愈

藍文豹字方井太學生善山水竹石又工寫真嘉靖間遊京  
師會肅皇召畫工貌皇太后不稱旨特宣文豹入宮乍啟  
簾俯伏而出一圖逼肖大被賜賚文豹喜為詩與草書往

往拔俗耻以寫真傳遂南還

蔡天奇邑諸生醫精素問本草以深思勝亦不屑屑赴人之  
召有危病以告天奇天奇輒問他醫診狀或取其方增減  
一二而奇中嘗語諸醫曰人有重病則我亦病病窮日夜  
之思僅可得起一人汝輩慎之平生耻受謝其行誼尤足  
多云

吳發號雲樵里仁人為太學生居京師善彈棋嘗以角巾野  
服遊於公卿間而數學尤精論休咎多奇中張江陵居正  
與之奕忽飛燕入枰江陵問發發曰師相將有楚行江陵  
疑母疾默然發曰往來三月耳頃報母逝遂馳驛還旋特  
旨起復召歸未歸百日成國府夫一宦遣使詢發發謂在



至尊無對之家尋知鶴繫於皇太后慈慶宮然致不欲為  
此一日於所居門扉書曰神仙牧子瀛海漁夫遂去竟無  
可跡昌南歷記

詹煜精堪輿之學遊吳越間名推縉紳嘗預決朱相公慶拜  
相而券以年月徵禍福多驗類如此

張鳳

一作鳴鳳

以堪輿著有仙婆集行於世

汪廷祚字濟字里仁都人精岐黃之術起疾療疴每多神奇  
尤慕義喜施神光熹懷間名聞江浙屢有匾旌年七十卒

吳學敬新正都人自幼讀書精於醫貧不計謝人稱之

方其道長安都人從儒習醫精其技淮藩病徵十全醫於縣  
衆以為莫如其道能比至則病危甚諸醫不知所為其道

一進藥而愈罷錫優渥賜詩有門裁金杏能捐疾寵養丹  
砂好駐顏之句及卒遣官來祭致哀悼焉子思讓亦以醫  
顯屢為當道所旌

國朝

吳棟字毓山杭溪都人少讀書通帖括業嘗冠童子試久之  
不過去攻岐黃術遂精片治病以意神明古法方益奇效  
益速就來者益衆多不責報依然士君子行也詩亦可觀  
著有詩稿一卷東木堂醫方集鈔十卷

人物列傳十

釋老

唐

鄭全福邑人幼不茹葷文宗時人縣東靈巖洞修煉後徙薄葉洞遊桃花溪見老人乘鐵船曰願借船還人間老人許之曰後三年當復來時已百餘歲語門人曰死必葬我浮梁白水鄉全福有一白鹿甚馴鹿去尋之不獲遂逝及舉棺輕發之惟杖履存焉

五代

恒春道者居南山溪谷中巾袖甚敝徒腰菴足覺間相引施藥於市或以錢濟貧者久之所善欲訪其居隨沿南坡

約行十餘里岡重澗複至則峭壁倚空清泉仰地間此何處道者曰雲平峽也運石為榻席草相對出茶果款客問道者居此幾時曰已久因今皇帝英明江南奉正朔得小安吾故偶出十年方太平我又遠去矣時周顯德間也問修煉術不答好事者聞之往輒中阻後不復出有至其地者巨石塞徑榛莽中遙聞虎聲懼而還竟失峽所在

宋

江山道者棲縣西之江山修真後建為萬善寺金君卿有記其龍池至今禱雨即應

了元字覺老號佛印邑之林氏子三歲能記諸家詩千餘篇出語輒合經史里中稱神童及長為儒流因讀釋氏書有

悟遂薙髮師寶積寺沙門日嘗命之樵乃運巨木橫門中師呵之對曰出家正求如此蓋示以閑字也既而出遊手植二柏於寺前誓曰柏枝相交吾當重來至廬山謁開先暹禪師暹加稱賞再謁圓通訥禪師補書記遷江州承天為開先嗣歷淮之斗方廬山之開先潤州之金山焦山袁州之大仰廬山之歸宗住雲居四十年會遊京師奉詔入內講經稱旨神宗賜號佛印并賜紫袈裟高麗磨衲金鉢以旌其德與蕪越最善并交秦觀黃庭堅居廬山時度堅有尺牘往還後於元符元年正月四日一笑而逝

企巷邑西鳳峰人幼出家寶積寺與了元同師日獨趺坐禪房了元名漸著治歎笠為行計約企巷與偕企巷曰兄出



山學道耶了元曰坐禪又何處是道後了元往雲居企卷亦遷金灘之西林石楠寺尋遊楚三載叅黃梅後歸石楠一日了元來訪同立月下問弟望梅止得渴未企卷曰兄持雲贈與誰來遂相視艱然而笑大抵了元多智時難歎諧滑稽企卷則戒律精嚴云

元

韓復齋號閑靜徽州府人幼出家休寧崇壽觀與徒汪致虛雲遊至浮梁時多疫與符輒愈不能遍乃焚符於井令病者汲水飲之皆有驗又有土神周侯為祟或迷婦女復齋往諭雷火立焚其廟鄉人為創西山道院居之

石舟漁父至正時安田都有樵者逐鹿入山澗曰哺波流洶

湧阻不能前踰宿崖穴中夜月明見一漁父刺小舟出峽樵者意是村隅居人亟呼之漁父搖手曰渡不得置船而去及旦視之船乃石也急出語人往觀見絕壁題字曰偶撐片石作漁梁蒼園芝田是故鄉休到人間侈奇事鉄船嘗泛海東洋至今石架澗峽

明

汪一雷字致虛休寧人有道術元末從師韓復齋來浮梁創西山道院其址為盧氏所施傍有李氏業各弗許一雷夜以虎懼之其人求禳遂并捨地于光延之禱雨設壇焚符按劍呼雷而雨立注臨化自題像云吾年七十七幾雨幾番風撒手清虛上一輪明月中殲葬西山後有發其墓者

中止一履其徒程洞清亦能呼風喚雨飛渡溪河役使鬼神及尸解葬其衣履於隴源

柴彬號中子自云向在雲臺學道來往聖壽觀三十年坐一榻不卧不見容蔬圃有重萼石榴一株彬或灌溉之一日命徒灑掃堂階治齋供云明日客至次日孫弁從其師友七八人遊觀中徒曰師今何致禮如是彬曰一堂卿相也久之榴杪忽結一實甚巨彬指謂徒長此榴留待雪時食是年雪深數尺徒俱晏起坐榻無彬榴亦不存雪路亦無行踪後弁師友皆貴顯如彬言

傭書叟不知何許人從杜公谷入十餘里有宏治間所蓋草屋乃其遺宅也傳叟年九十餘猶為人抄寫書籍甚精間則走蓬蒿深處踪迹之所在見麋鹿相隨久之他去莫測所終至今屋址宛然石榻丹竈猶存

法真仙縣北明溪朱氏子生于嘉靖初在胎母不受葷及產却葷乳四歲偶逢大龍山一僧便稱師隨出家大龍山往往預占未來事人已神之年十四而終先言終之月日囑火化後顯靈救人江湖間人屢踪跡來謝鄉村禱雨輒應至今香火本山稱明法真仙

吳清虛或云燕趙人嘉靖初遊景鎮眸然道貌蒼頭負杖相隨人異之延住建陽山堂每出數日或浹旬乃歸已而他通萬歷間復來襄陽門下者多支離老朽而清虛仍故顏也其蒼頭荷杖待從如初人益異之有願受學者清虛曰



隨我甚難孤行長往食糲衣枯訪於深山求於大海偶爾  
人間飄然物表公等能乎石馬騎顏鉞船撐破魚謂也只  
當為之事便為可盡之心務盡聖骨凡胎所爭正在於此  
一日留牋云薄遊昌水為紅塵子所算遂去聞清虛之前  
有沆叟後有彭幼朔皆抱奇踪異術間見於時人不能測

國朝

性德字天峨自峨嵋來徑東山祝禧寺圓寂時偈曰土木形  
骸水火性命去去來來六根清淨越三年有賈人語其徒  
曰曾見汝師同冶匠王某在建寧募鐵云歸銘鐘既而果  
與冶匠泛舟昌江迤邐抵東山麓莫知其所適順治八年  
鍾成土人立像祀之

釋清如吉安人父為諸生虛試不售落髮為僧遍遊名勝至  
邑之南鄉景德寺居焉清如全兄奉母命尋父母囑曰父  
不歸汝二人毋返歷歲餘至寺見父泣勸再三父矢不回  
二人亦依戀不去願同出家父曰若然則宗祀絕矣於佛  
前拈闍長子得回家養母清如遂同父虔心頂禮父歿募  
建雲錦庵於辛合都大路邊自奉菲薄以眾工匠食餘之  
飯入水淘淨自食戒行清苦如此將歿自知時日臨期沐浴  
浴入龕閱歲啟視如生遂以肉身奉祀庵內後庵不戒於  
火忽有人突入烟燄中負之出旋遍覓其人不得咸以為  
清如之靈云



人物列傳十一

流寓

晉

葛洪字稚川自號抱朴子句容人太安中過魚步都登盤山  
有巨石一方蒼赤大數十圍曰此大類餘杭山日生石結  
茅石上修煉歲餘而去餘詳晉書本傳

郭璞字景純河東聞喜人太興中至縣南登大來山之絕頂  
俯瞰羣峰疊起謂此山千門萬戶當生封萬戶侯者即山  
川志之萬戶山也餘詳晉書本傳

唐

陸士修宮太子賓客顏魯公建中時守郡行部新平修與公

友善遊新平同止雲門教院數日中宵茗飲聯詠有素瓶  
傳靜夜芳氣滿間軒之句載雲門斷碑雲門今馬鞍山西  
麓昌南歷記

藍采和不知何許人也當日有客過縣跡甚異倏忽現於羣  
山至夕陽嶺吹笛聲入霄漢人以為采和云餘詳續仙傳  
宋

蘇軾字子瞻眉山人因子邁為銀陽尉來遊昌南訪同年友  
程筠於家決旬而別筠與詩有行旌既待金門詔邱壑恒  
留太史書之句蓋軾曾為筠賦先墳思成堂歸真亭二詩  
也又嘗偕黃庭堅至城北寶積寺後人以軾喜寺僧了元  
而庭堅亦與往遂遂合祀之曰三賢堂

荀叟者不知名自言姓荀從者數人來自河東卜居鞍山之  
野操行恭樸課僕耕田灌園以贍久之就江游蓋草亭日  
危坐其中適高軒過訪人問客為誰從者曰今侍御祖公  
無擇也與叟有故因來相視無擇留信宿乃市片木大書  
田兀然懸之亭而去登車回顧猶歎曰高士也

劉輝字之道鉛山人本名幾改曰輝登嘉祐四年進士第一  
初父巖遊學縣南孛家居里仁都東山之麓而輝生厚自  
少迄長從學邑中最久嘗與程筠遊讀書禪師山雲林別  
墅餘詳嘉溪筆談及江西通志

岳飛字鵬舉相州湯陰人紹興三年飛既討平彭友諸盜秋  
八月自江州入朝浮鄱江沂昌水泊景德鎮駐於肇陽石

壁之下登陽府山絕頂延眺良久為山僧朗日留三宿而去題有聯今尚存

朱文公燾字元晦婺源人嘗讀書縣東之洞靈巖

白玉蟾字如晦瓊州人本葛長庚也自號海瓊子嘗遊浮梁愛雙溪山水之奇流連賦詩後人刻之石

吳潛字毅夫寧國人嘉定十年進士第一歷官左丞相封許國公為賈似道所銜以沈矣初落職謫建昌軍携幼子碩過縣南至里仁都碩有卜居意而潛謂入山不可不深乃往銀溪入谷數里闢址山椒為歸老計常賦詩曰遠引山中是隱淪豈因君上豈因臣衙門日月爭多少頓首臨安幾度春尋由建昌徙湖州安置循州而卒碩後遂來家於

新平之市餘詳宋史本傳

明

舒芬字國裳進賢人世稱忠孝狀元者也嘗舟過陽府上流

村居幽僻登岸閒步人言某家牡丹方開芬到門時主人他出有穉子導至後軒見花成數百朵心愛之素筆書壁壁曰花發滄江岸春光擬洛陽國中皆讓色天上持苗香適園丁從外入謂客勿汗壁芬笑而止既去主人歸知為芬追之弗及乃自署於後曰某年月日舒穉溪先生詠牡丹詩正德十四年秋芬曾留景德鎮數日賦雙溪夜月一章

杜谷老人不知里居名氏嘉靖中率數僕童杖履尊嚴來遊



景德鎮止杜公谷因稱杜谷老人蓬戶藜牀愉然自得踰年唐順之造其廬蔬黍款留數日偕飲朝陽峰順之曰朝廷起老師者再今遠引得毋孤聖主意乎老人曰應德何不知我我多年僱蹇不能為章楓山矣順之默然既行羅洪先又謁之知皆老人門下士也未幾老人亦去

徐紳號五台建德人楊忠愍總盛年語謂出銀為其買地者也本桃墅汪某之甥少即就塾師於外家迨後歲時伏臘往來甚數與處士汪柳峰彬善為題其別業曰虛白樓至今筆跡尚存

宋文十進賢人性介直始嘗與傅冠同師冠及第凡行事多所規勸冠甚敬之崇正中冠累官至尚書大學士文十猶

老諸生也招之不就及冠因誤判章奏引罪放歸而文十適以姪故容景德鎮寇聞之枉道過昌南要與俱歸文十曰公治第太多殖錢太多列歌舞太盛收奴婢太眾我見安能默默徒取厭惡無謂也冠曰願受藥石於先生文十乃偕登珠山引觴為歡凌晨披雪同還故里

鄭三俊字伯章建德人本唐左僕射政之裔以公墓在縣北長寧都時來展拜主其族錦江貢生彩家相與至歡晚以吏部尚書罷歸遂挈家居彩之隱庵草園徙中村年八十餘生子錦福以錦江故名也後復還建德餘詳明史

國朝

朱軾字若瞻號可亭高安人傾解後嘗訪其宗同年瑞齡於

北湖北湖密迺縣城居旬餘或人勸之謁邑宰賦義弗往  
蓋名臣進止其初已嚴正不苟如此

中華民國廿四年三月七日 收到

少

2808

